

NKONKO NÈ MANDAMUNA

PA EBÈLU CITUPÀ II



Ndi nswà dyàmbedi kusàkidila yònsò wa kunùdi uvwa mupetè mukenji bwà “kusambidilakù mukàjàànyi.” Mmusaamè bikolè, bikolè be. Katùvwa bamanyè ne cìvwa ncinyi to, ne katwèna bamanyè ne cìdi cyenzèke ncinyi to, òvwa ànu dilùka dikolè ne yèyè ùkaavwa ànu wa kàyi ùmánya kantu to, ne mubidi-luuyà wìpacìla too ne mu makùmi ànaayi ne citùpà, bìkaavwa bikèngela bàmulamè mujìngìlà mu mbùlankètè yà mabwe a mashika. Pa nànkù. . .kàdi ùdi bìmpè mpindyewu. Mubidi-luuyà wònsò awu wùkaadi muyè, ne yèyè ùkaadi bìmpè. Kàdi ùdi ne mateketa mabi be, mujimije kilò bu yìnaayi ne citùpà, ngeela meeji. Kènà ne. . .Dilòdòlò edi mmudyèku kèndè kantu kàà kumpalà kàà disùma ku mènù kacya ànu ku dyàlumingu aku. Nènku mmusaamè bikolè byà dikèma, kàdi tuvwa beeyèmene Mukalenge bwèndè yèyè, ne Yèyè wàmütùùlu ku bwalu abu. Mpindyewu tudi baswè kunwàmbila bwà nwàtùngunukakù ne kusambila bwà àpetululèku bukolè.

³⁰⁴ Nènku mpindyewu, ndekeelu wa lumingu ulwàlwa ewu, bu Mukalenge mwà kwanyisha, bikèngela nye ku Miami. Mulunda wanyì wa kale, Mwanèètù Bosworth, ùkaadi wàlukila Kumbèlu, ne yèyè ùkaadi ne bidimu bìpacìla ku lukàmà mpindyewu. Nènku mmumbiikile ku téléfònè, wàmba ne: “Mwanèètù Branham, lwà dyàkàmwè ùmmònè, ndi muswè nkwanbìleku cintu kampànda kumpalà kwà mèmè kuya.” Nènku yèyè. . .Èè, ngeela meeji ne mmuswè kunsambidila, ne kuntentekela byanza kumpalà kwà kuyayè, nudi bamanyè’s.

³⁰⁵ Ne mèmè ndi—ndi ntèkemena ne ndikù mwà kujikija àànyi matùkù ne luumù bu lwà F.F. Bosworth. Ku bantu bònsò bándìku mumanyè pa buloba, muntu yònsò ùnkaadìku mutwilàngàne nendè pa buloba, kacya ncitukù mwanjì kutwilanganakù ne muntu ùnkaadìku mujingèjìnge kufwànangana nèndè bu mùdi, bu mùdi F.F. Bosworth to; bu—bu mwambi, mùndì njinga kwamba. Kacya ncitukù mwanjì kuumvwa muntu nànsha umwe, buloba bujimà, nànsha penyì, mwambèku dìyì bwà F.F. Bosworth kadiyikù ànu menemene mu byònsò ne “mmwena Kilistò” to, ne mu byònsò ne “mmwanèètù mulelèlà.”

³⁰⁶ “Dishiyangana didi dishiya paanyimà pèètù bidyacilu byà makàsà pa nsenga yà cikondo.” Yèyè mmwanèètù mulenga wa dikèma, kàdi ùkaadi mukùlakajì wa menemene mpindyewu, wìpacìla ku bidimu lukàmà. Pa nànkù ùkaadi—ùkaadi ànu wàlukila Kumbèlu, kwàjìkì, ne yèyè ngwàngambidì. Ùvwa

mumanyè ne ùkaavwa ùya, kàdi ùvwa ànu mwindile cyaààà. Kwambayè ne cikondo cyà citàmbe kwikala cyà kalolo cyà nsòmbelu wendè mmpindyewu mene pàdiye ànu mwindile apa, kàdi kwambayè ne ùvwa mumanyè ne ùkaavwa ùya.

307 Mémè kwamba ne: “Ndi ne cyà kuya ku Michigan mu lumingu elu, Mwanèètù Bosworth.”

308 Ki yéyè ne: “Èè, kùtàmbe kubinèngesha to, Mwanèètù Branham, mémè ncyèna mwà kushààla kàbìdì ntàntà mule to. Ndi ngenda ntàmbe kuteketa díbà dyònsò.”

309 Pa nàнку yéyè mmutàmbe kwikala mulundà wanyì, mu mùshindù wà nciyi mwà kubènga kukùya to. Mpindyewu, byòbì bikèngela bwà nye ku ndèkè, nê—nèngààlukilè ku ndèkè ne pàmwàpa mpinganè nànsha bwà dilòòlò dyà dyàlumingu; kabiyi nàнку to, èè, díbà adi nebikengelè nye ku màshinyì, ne bìdì mwà kungangata mukùngùlù mule ndambù.

310 Nèнку nwàsambidilaayikù Mwanèètù Bosworth. Nùlombàayi ànu bwà Nzambì. . . ne pàngatàYe nkambwà mununu awu, bwà Àtumèku dikalù dyà kapyà bwà òmwambùlè, nwamònu’s. Mémè ndi mumunangè, yéyè ùkaavwa kùndì ànu bu papa.

311 Muntu mukwàbò mununu. . . yéyè ne Mwanèètù Seward. Ntu—ntu ànu bu udi ne cintèkantèkà bwà bantu banunu’s, ntu—ntu mubànangè. Kàdi Mwanèètù mukùlumpè Seward awu, wákaya pèndè mu tulù mùshindù awu. Mu bushùwà bwà bwalu, Mwanèètù Seward awu, kàvwa ànu mutàmbe kukùlakaja to, ncyèna ngeela meeji nàнку to, mùdì Mwanèètù Bosworth amu.

312 Nèнку nwàsambidilaayikù Mwanèètù Bosworth. Maalu ónsò kaèna malenga mu mwaba awu to, kàdi bìdì—bìdì. . . Ùdi dijinga ne masambila ènù, kàdi kabiyi menemene ànu bwà ní nciyi cyònsò to kàdi ànu bwà dyèndè. . . bwà Nzambì àmulekèlèku ùya mu ditalala.

313 Mpindyewu. . . Ne pashìshe, tudi kàbìdì baswèku kuvùluka, bwà ne mààlabà, bu Mukalenge mwà kwanyisha, tudi tujiiika umwe wa ku balundà bèètù wa mu èkèleeziyà emu, Mwanèètù Sol Coates. Ùvwakù mulwàlwàlwe kaaba aka misangu yàbùngì, mwenzè mudimu ku poste munda mwà bidimu. Kàdi nyawù mufwile ku Lùpitaadi lwà Bankòlomù dilòòlò dyàdya. Mémè ne Mwanèètù Cox tuvwa bayèku bwà kumumòna, kàdi ùkaavwa. . . mufùbe yònsò. Kàdi wàlu kufwà mpindyewu, mwena Kilistò. Nèнку bikèngela bwà tùmuumùshè ku Nzùbù wa Bitàlù wa Coots bwà kuya kamujiiika mààlabà awu mu mapingaja pa díbà ùmwè jaajaaja, mémè ne Mwanèètù Neville. Kasùmbù kàà misambu kàà bàsàtù kàà Neville nkùikalà mwà kwimba; ne netwàbanyanganè masangisha, mémè ne Mwanèètù Neville. Mbwena kwamba ne, ncìvwa mumanyè patùvwà tudyànjila kulongolola maalu apu ne nciyi menemene to, ciinè aci ànu bwà

Meda. Ne pa nàнку, dìbà adi, madilu èndè neènzekè mààlabà awu mu mapingaja pa dìbà ùmwè jaajaaja, ku Nzùbù wa Bitàlù wa Coots.

³¹⁴ Ne pashìishe, pa dìbà ibìdì jaajaaja, mu diitànù, Mukalenge kampànda Wheeler. Tuvwa twètù tumubiikila ne Pod Wheeler; yèyè ki, nyewù ngápù ne mwoyi ntanyi wendè mulelèlà. . . Nènku, nudi bamanyè's, ndi—ndi mfùma ku dicimòna mu cibèjibeji kàdi ncìyi mumanyè ne ùvwa nganyì to, too ne mungààlu kujandula. Ùvwa mwena mutumba neetù munda mwà bidimu, kàdi—kadi nyawù wáfù's. Ùvwa ànu kaaba aka kumpàlà kwà èkèleeziyà eku, dilòòlò adi, ne mèmè mvwà nteeta bwà kumuswishisha bwà kulwakù mu èkèleeziyà. Dilòòlò adi, kùkaadi mbingu bu yisàtù nàнку, ùvwa mwimàne mwaba awu mene, ne mèmè nteeta ànu bwà kumuswishisha bwà kulwa kubwela mu èkèleeziyà. Bwalu, ncyèna ngeela meeji ne yèyè uvwà uyè mu èkèleeziyà anyì mujikùlekù diitabuuja dyà mùshindù kampànda to, kàdi pèndè's ùdi ne mwànà wa balùme mwikàle muyiishi mu ba-Baptistes. Kàdi yèyè kàvwaku ne diitabuuja kampànda divwàyekù ùjikula to bwà ku dyànyì dimanya, kàdi mpindyewu nyawù wàyì bwà katwilangana ne Nzambi. Nènku aci neciikalè mu diitànù mu mapingaja pa dìbà ibìdì jaajaaja ku Nzùbù wa Bitàlù wa Coots. Kàbidì, Mwanèètù Neville ne bakwàbò abu mbiikalà mwà kwimba, ku diyishi dyà ku citalù aku kuntwaku.

³¹⁵ Nènku, ewu yònsò wa kunùdì udi muswè kwikala mu masangisha awu, mmààlabà pa dìbà ibìdì jaajaaja, anyì, mààlabà pa dìbà ùmwè. Ngeela meeji ne mmwòmò. Kì mmwòmò anyì, mwanèètù? Ne pa dìbà ibìdì, anyì dikwàbò adi. Mmwòmò anyì? Pa dìbà ibìdì, ku Nzùbù wa Bitàlù wa Coots.

³¹⁶ Nènku mpindyewu, mu dyàlumingu mu dindà. . . Mu diisambòmbò nekwikalè diyishi dyà ku tudyòmbà. Nènku pàmwàpa Mwanèètù Neville neànùmanyishè, kumpàlà kwà diinè dìbà adi, ànu ciikalà. . . ní twènza mudimu wà dyondopa bwà mu dyàlumingu dilòòlò, anyì ní ndìbà kaayì ditwàlukilà mèmè muyè ku ndèkè ku—ku Floride bwà kamòna Mwanèètù Bosworth. Ncyèna ànu mumanyè mungààshiyanganà nendè to, yèyè nyawù mulundà munanga wa kale wa mùshindù awu. Ne pàmwàpa mbikondo byètù byà ndekeelu byà ditwilangana, byòbì ne, bu Mukalenge mwà kwanyisha, bwà pa buloba apa. Ne yèyè. . . Ncyèna mumanyè ní ndi mwà kumbà kushiyangana nendè dyàkàmwè anyì to; ne ncyèna muswè kushiyangana nendè to, kàdi, nudi bamanyè mùtùbì amu, pèèbè ne makwàbò maalu a dyenza.

³¹⁷ Mpindyewu ndi ne díyì dimwèpelè dindì muswè kwamba kaaba aka pàdìku kakùyì bantu bààbúngì apa, ne bantu bàdì balundà bàányi.

mukalenge. Kàdi ncyèna mmòna...Ndi...Mpindyewu kùdi mwà kwikala, bwà ku dyànyì dimanya, muntu kampànda, ngàngàbukà kampànda mwab'ewu. Kàdi mèmè mutùpàkàne pa cibùmbà cyà ku cyambilu eci, Nzambi àmfwilèku luse. Kàdi ndi ngeela meeji ne Nzambi neàmbwishè bangàngàbukà abu bujitu bwà cidibo benzèle mukàji awu aci. Mèmè ntu—ntu ngiitabuuja dipandangana, ntu ngiitabuuja manga a lwondòpù. Ncyà bushùwà ne, ntu mbiitabuuja. Ntu ngeela meeji ne Nzambi ngudi mubàtùme pànu bwà kutwàmbulwisha, ànu mùdiYe mutùme balongolodi bàà màshinyi a tudyèndelandelà ne bikwàbò amu. Kàdi mukàji mukesè awu, ngàngàbukà ùvwa mumushiye mulààle kwàka, mwambè ne: “Ùvwa mùle tètè ne kànsèrè, kakwèna cidi mwà kwenjiibwa nànsha cìmwè to.” Maamù mukesè wa musumbà wà bàna.

323 Mèmè kuyà kùdi mukàji awu, ne kuteeta bwà kuumumvwija mùdi ku disambila...Wa bwalu—wa bwalu yèyè ùcidi ànu mukàji mutekète, wa bidimu biipacila ku makùmi àbidi ne bitaanu. Ne mùshindù mwinè wùdi Nzambi mwondòpe mwanèndè mukesè wa mu dibòko awu's, bamwinyike ne “mwànà-cishimà” ku lùpitaadi lwà bàna alu aku patùdi twakulangana apa, ku disaamà dyà nshingù wa kabaala. Ne mu mùshindù wà wùkwàcisha bwôwà wà—wà mùvwà mwànà mukesè awu ùsanganyibwa, kàdi Mukalenge kumwondopaYè dyàkàmwè. Bòbò, bangàngàbukà abu, kabàvwakù mwà kubyumvwa to. Mèmè kuya kùdi Màndàmù Harvey, ne kwamba ne: “Mpindyewu, Màndàmù Harvey, bangàngàbukà's bààkulekèdi's?”

324 “Èyowà's, mukalenge. Bidi... ”

325 Ki bàyendè kwambayè ne: “Èyowà, kakùcyèna cyà dyenza to, yèyè mmùle yònsò ne kànsèrè.”

326 Mèmè ne: “Èè, mpindyewu citùdi baswè kwenza, nkwitabuuja Nzambi ne, Nzambi neò—neòndopè... àkondòpèku.” Ki mèmè ne: “Mùshindù wùdibi byènzeka, kànsèrè aku nkafwànyine kubènga kuumuka dyàkàmwè; kàdi twètù basambile, dībà adi mwoyi wà kànsèrè aku newùmukè. Udi mwà kushààla mucikàle ànu usaama bwà cikondo kampànda, ne—ne” mungààkambà “udi mwà kupeta diikisha dyàkàmwè.” Ki mèmè ne: “Pashiishe paanyimà pàà ndambù wa matùkù udi mwà kusaama bipite ne byà kacya kwònsò eku.” Kàdi mèmè ne: “Bikèngela ùteekè diitabuuja dyèbè diikàle dilwishangana ne kànsèrè aku.” Mèmè ne: “Kànsèrè aku kòkò kiikàle ne mwoyi, wèwè ngwáfwa. Kànsèrè aku kòkò kafwè, wèwè ngwìkala ne mwoyi.” Ki mèmè ne: “Mpindyewu netùsambilè.”

327 Ki twètù kusambila, nènku ne cileeji cyònsò cingààkamònà, Nzambi wàkalenga mubidi wà mukàji awu. Ki dyàkàmwè kuumvwayè bimpè, kuyayè bwà kumòngangana ne mààmù wanyi

mémè, kuyayè wènda ùkùmbulangana mu nyùngulukilu mwònsò amu, (pèndè's ùvwa mulengè dikènga ne byànza) kàciyikù ne matàkanyika to. Ne pashìishe paanyimà pàà matukù matwè ku àsàtù nàнку yèyè kubanga kusaama cyàkàbìdì.

³²⁸ Ki pashìishe mémè kufika ku dijandula ne beena mu cimenga bàvwa bambè ne bóbò “nebàfutè mfrangà yà ngàngàbukà, bu bangàngàbukà abu mwà kucipanda.”

³²⁹ Nènku mpindyewu mémè nì ngudi mupìile, Nzambì àmfwilèku luse. Kàdi bààkangata maamù mutekète awu, kumuvwijabò “cyà diteetela mamanya” àbò awu. Kuyabò nendè kuntwaku, ne kupàtulabò mene ne mala munda mwèndè amu, ne bikwàbò byònsò. Kuumushabò byònsò mu njila wa mēnyi ne mu njila wa bunyawù, ne kubifinyikabò ku nseke aku. Nènku kwenzayè mèbà citèemà ne byà mu njila pa mèèsà a dipandilangana apu. Mungàngà mukàji awu ùvwa ùlonda ne: “Bìvwa ànu bu nzùbu wa cishipeelu's, mùvwàbò bààtèeka apa bààtèeka apa byàmunda byèndè abi, ne kumwelabò ovaires ne trompes yà bindundu.” Abi mbyà ciipanshi's, kàdi mbilelèlà. Ne mala a bindundu ne bikwàbò mùshindù awu, ne kushiyabò mukàji awu mulàadika mu mùshindù awu, maamù mukesè. Mémè ndi ngamba, mu wànyì pàànyì mùshindù wà kucyèlela meeji ne, bangàngàbukà abu mbapìile bwà dishebeyangana.

³³⁰ Yèyè ùvwa mubàmbìle, mwambè ne: “Mwanèètù Branham ùkaadi munsambidìle.” Ne mwambè ne: “Netwìtabuuje ne kànsère kèètù aku kàdi . . . ne kànsère aku nkafwè.”

³³¹ Awu ne: “Mémè ndi mupetè mapyamàpyà bwèbè wèwè ne: ‘Kànsère kèèbè aku kàdi ne mwoyi.’”

³³² Mmunyì mùvwàyèkù mufwànyine kucimanya? Kòkò kàvwa munda, cyamù cyà mīdimà nànsha cimwè kacìvwakù mwà kujandula aci to. Kànsère kàtu. . . Kwèna mwà kujandwila kànsère ku cyamù cyà mīdimà to, kòkò kiinè kàtu mmusunya, kwèna mwà kukàmòna to. Kùvwa cintu ànu cimwèpelè cìvwàbò benzè, nkupanda mukàji awu kàdi kumukòsolola tutùpà tutùpà. Kwàjiki. Mpindyewu bu ne cìvwa mmamù mukesè, mémè mvwa mufwànyine ànu kuteeta diitabuuja dyèndè kumpàlà kwà Nzambì pamutù pàà kuvwija muntu “cyà diteetela mamanya” mùshindù awu. Mpindyewu mémè nì—mémè nì ngudi mupìile, nì mmémè—nì mmémè udi ne kalumbilà kabì, ndi muswè bwà Nzambì àmfwilèku luse, nudi numòna's. Bwalu ncyèna muswè bwà nwènù kwela meeji ne ncitu ngiitabuuja dipandangana anyì ncitu ngiitabuuja mu bangàngàbukà ne bikwàbò abi to. Bìdì ànu bimpè. Kàdi ndi ngeela meeji ne bìvwa bikèngela wikalè mumanyè cyùdì wenza kumpàlà kwà kumbula mu muntu, kabìyi kukwàta nendè mudimu bu cya kuteetela dimanya mùshindù awu to. Ncyà bushùwà. Nènku mpindyewu, mu bushùwà bwà bwalu, mukàji awu kèna mwà kwikala ne mwoyi to. Kwàjiki. Bu yèyè mwà kwikala ne

mwoyi, ncyà bushùwà ne neciikalè cimwè cyà ku bishimà byà bitámbe bunène bikaadiku byenzèke kacya. Pàvwà mukàji awu mutàngile panshi e kumòna byàmunda byèndè ku luseke, ne bikèngela twonyi twèndè twikalè tütàmbwila luseke lukwàbò, s'mmumbè kudifwila ànu mùshindù ewu, mufwè. . . Mòna's, kacivwa cintu. . . mukwàcikwètù awu's wàkafwà. Ne mwikàle ànu maamù wa bidimu bu makùmi àbìdi ne bìbìdi anyi makùmi àbìdi ne bitaanu nàнку awu wa bwalu ne bàna bakesè bàà dikolesha bàsàtù anyi bànaayi. Cintu citámbe kwikala cyà cyènza luse cinkaadiku muumvwè kacya bàndela's. Mémè kwamba ne: "Ku dyànyi pàanyi dyela dyà meeji pa bwalu abu, ngàngàbukà awu ngudi mupiile bwà. . ." Piikalàbi ne ùvwa mwangàte mukàji awu ànu bu cyà diteetela dimanya ne bwalu beena mu cimenga bàvwa mwà kucifucila mfrangà, dìbà adi abi mbìbì, kabìvwa bikèngela kwikalaci cyanyishiibwe nànsha.

³³³ [Muntu kampànda ùdi ùkonka ní Nzambì ùdikù mwà kulongolola mukàji awu—Muf.] Èè, nyawù nkwambila's, mwanèètù, kì nnè kabyèna mwà kwenzeka to. Ne bìdi—kabyèna. . . Bìdi—bìdi mwà kwenzeka, ne kabidi bifwànyine kwenzeka. Bwalu ndi mumanyè muntu uvwa ne dibòkò dikòsèke, mu Californie (nudi bònso munkaci mwà kucilonda mu cibèjibeji), tuvwa bamusambidile, ne *edi* dibòkò òvwà dikòsèkèle *apa* adi, dikaadi ditòlòke too ne mùdi minu milwè kupàtukakù patùdi twakulangana apa; kupita lukèngibwa, kupita ndungilu wa cyanza ne dibòkò, kupita cyanza, ne bitùpà byà manungu a minu abi mbyalùkile pa minu apu, nudi numòna's. Cidi mu, mùndi ngeela meeji, mu *Mukòbodi wa Dìitabuujà* ku ngondo yònsò. Nànsha mene pàvwàyè mutèeke byanza byèndè abi mùshindù ewu; bìvwa bìleeja mwaba wùvwà dibòkò dyèndè dikòsèkèle awu, mwaba wùvwàdi ditòlòkèle. Ku ngondo ne ku ngondo mùvwàdi dyènda dilwa, bu munda mwà cidimu cijimà nàнку.

³³⁴ [Mwanèètù awu ùdi wàkula cyàkàbìdi—Muf.] Bushùwà's, ncyà bushùwà. Mémè ndi ngiitabuujà. . . N—n—ncintu cyà ku mpùùkàpùùkà, nwamònu's, ncintu cyà ku mpùùkàpùùkà menemene. Ku misangu ntu ngumvwa bàcyamba. Mpindyewu, bwà Mwanèètù Bosworth, yèyè wàkasambidila muntu mukàji dilòlò kampànda. Ne mémè ngàkasambidila umwe mu disangisha dyànyi. Kàdi cyà Mwanèètù Bosworth cyòci cyàkenzeka dyàkàmwè; cyànyi mémè cyàkangatakù ndambù wa cikondo bwà kwenzekaci.

³³⁵ Yèyè wàkasambidila mukàji kampànda. . . Mpindyewu, mvwa mubalè bujaadiki bwà mukàji awu. Ùvwa ne kànsèrè, kàyikù ne dyùlù to; kàvwa kamudyè dyùlù dyònsò. Kàdi pàakacyàbu mu dindà mukàji awu ùvwa ne dyùlù. Mpindyewu, ndi mumanyè eci. . . Mpindyewu, aci ncyà Mwanèètù Bosworth, mu mukànda wèndè wùdi wùbikidiibwà ne *Kilistò Mwondopi*, ngeela meeji, anyi, *Mutwàdi wa Disànka*, ewu anyi ewu.

Mpindyewu, mmu bujaadiki bwà yéyè mukàji awu, ne dîna dyëndè ne mwaba wùdiye musòmbèle. Ne yéyè ùdi ne beena mutumba ne bangàngàbukà ne bakwàbò bwà kucijaadika ne, ncyenzèke.

³³⁶ Mpindyewu, ku Little Rock, mu Arkansas, dilòlòlò kampànda mu cibambalu, ngâkasambilamù...kî nku Little Rock to, kàdi mmu Jonesboro. Ngâkasambila...Mémè kwamba ne: “Nênshaalè too ne pângààsambidilà muntu wa ndekeelu.” Mvwa mwenzè matùkù mwandamukùlù a muunya ne a bufùku pa cibumbà cyà ku cyambilu apu, nwamònu’s. Ki dîbà adi...ki mu cibambalu amu mukàji kampànda kuseemenayè, ùvwa mukwàte mùshwalà wèndè kuulu nùnkù ewu, kàdi mémè kudyàmbidila ne ùvwa ùdila mwadi. Ki mémè kwamba...Kaa, ngeela meeji ne tuvwa dîbà ìbidì anyì ìsàtù wa mu dîndà, mémè kwamba ne: “Kùdidi to, mwanèètù wa bakàji, Nzambi m’Mwondopi.”

³³⁷ Yéyè ne: “Ncyèna ndila to, Mwanèètù Branham.” Kuwùmushayè; kàvwakù ne dyùlù to, nwamònu’s. Bangàngàbukà bàvwa bambè...Kànsèrè kàkaavwa kamudyè too ne pa mufùbà mutòòke wà munda mwèndè...yìvwa mimwènèke patòòke. Ki mémè kumusambidila, ne kulòmba Mukalenge bwà àmwondòpè.

³³⁸ Nènku mu mbingu bu yìnaayi anyì yìtaanu nànkù kuumukila apu, mvwa nsanganyiiibwa mu Texarkana. Nènku kùvwa muntu mulùme mukàlàngà muvwàle bilenga musòmbè mwaba awu, kwambayè ne: “Ndikù mwà kwamba ànu dîyì cyanààna anyì, Mwanèètù Branham?”

³³⁹ Mmwenzè ànu ùbànda pa cibumbà cyà ku cyambilu apu, umwe wa baawisiyè kuteetayè bwà kumupuwisha. Mémè ne: “Èè, lekèlèbi tùmone.”

³⁴⁰ Yéyè ne: “Udikù ujingulula inábànzà mutekète ewu anyì?”

³⁴¹ Mémè ne: “Bwàlà, to.”

³⁴² Inábànzà awu kwambayè ne: “Bu wèwè mwà kutàngila fòtò ewu udi mufwànyine kumuvùluka.” Muntu mulùme awu ùvwa mujikiji wa benzàvi mu—mu Texarkana, ne ùvwa mmawèndè mwikàle ne dyùlù dipyadìpyà disasè, diikàle ne mmwènèkelu ànu wa dyà kumpàla adi.

³⁴³ Mpindyewu aci cidi cileeja ne Nzambi...Mémè nkààdikù mucimòne cyenjiiibwe. Mpindyewu, Nzambi ùvwa mufwànyine kwenzela Màndàmù Harvey mukesè awu nànkù. Ne ndi ndòmba bwà kucyènzaYè, bwalu mukwàcikwètù awu mmuswè kwikala ne mwoyi.

³⁴⁴ Mwanèètù Tony, ùvwa ne bwalu kampànda anyì?

[Mwanèètù Tony ùdi ùfila mulubù wà dyondopiibwa kampànda—Muf.] Eyo.

Amen. Amen. Èyowà, aci kàbidì, s'ncìmpè. Èyowà, ncyà bushùwà ne Yèyè neàcyènzè. Yèyè m'Mwondopi.

[Muntu mulùme mukwàbò ùdi wèla nsèkè—Muf.] Èyowà. Èyowà. Èyowà's, mwanèètù. Amen. Bushùwà's. Èyowà.

³⁴⁵ Ndi cyà bushùwà mufwànyine... Mona's, ndi ntèkemena ne Nzambì ùdi ùkwalujulwilaci's, mwanàanyi wa balùme, udi mwà kwalukila naaci ne kumuleeja. Aci ncyà bushùwà menemene. Cìdi mbwà bujaadiki bwà butùmbì bwà Nzambì, ndi ndòmba bwà Nzambì àcyènzèku. Kaa, Yèyè—Yèyè... Yèyè mwikàle Nzambì wa Bukolè bwònsò, Ùdi mwà kwenza bintu byònsò. Yèyè kàyi mwà kwenza nàнку to, bintu byònsò, Kèna Nzambì wa Bukolè bwònsò to.

³⁴⁶ Kùdi cintu cìdi citwènzè twètù citùdi eci, mu mùshindù wutùdi ewu, bwà cyanààna nùнку tudi ne—ne mutù bu wà nyuunyi, anyi cintu kampànda cyà mùshindù awu, bu ne kakùvwakù Mutù wà meeji kampànda paanyimà pèètù bwà kwenza yònsò wa kutùdi ne kwisù kwà mùshindù kampànda, bwà kwenza mucì wà nsànga, mucì wà cilòmbàlòmbà, dibwè dyà ngaji, ne—ne kufila dishiilangana pankaci pààbì pa bìdì bitàngilà cì—cìdibi. Kàyi ùtwènzà ne... bàmwè biikàle ne bukuuyikuuyi, ne bàmwè ne masàlà, ne bàmwè ne bisèba, bwà nwènù... Nwamònu's, cìdi—cìdi m'Mutù wà meeji kampànda paanyimà pàà byòbì abi, wùdi—wùdi wùlombolà byòbì abi. Mu bushùwà bwà bwalu Yèyè mmulamè bintu byònsò mu byanza Byèndè. Ne ndi mumanyè ne Yèyè ùdi mwà kwenza bintu byònsò. Nènku netùsambilè bwà cyòci aci, netùsambilè.

³⁴⁷ [Mwanèètù wa balùme kampànda ùdi wàkula ne Mwanèètù Branham—Muf.] Menemene. Tudi ne... .

³⁴⁸ [Mwanèètù wa bakàji Snyder ùdi wàmba ne: “Mwanèètù Billy, mfwilèku luse.”—Muf.] Èyowà's, mwábàna, mbìmpè, akùlaaku. [Mwanèètù wa bakàji Snyder ùdi ùlonda mùvwàye mwondòpiibwe pàvwà Mwanèètù Branham mumusambidile mu dyàlumingu kampànda.] Amen. Udi mumanyè's, mvwa nteeta kwela meeji's, Mwanèètù wa bakàji Snyder, musangu kampànda wùmvwà mwimàne kaaba aka mu dilaabiibwa adi, mvwa ndyambidila... Mèmè kwambila Mwanèètù Cox, mèmè ne: “Ncyàkuteeta nànsha kàbidì kwenza masangisha a dijingulula awu ku tabernacle kwàka to.” Kaa, kwèna mumanyè mùdi démon awu ùntàcisha to, mwanèètù wa bakàji. Mùshindù—mùshindù mwinè wùdiye ùcyènzà's wè! Nudi bamanyè's, ùngambila bwà majingulula aa's.

³⁴⁹ Kàdi mònaayi, kwenzekabì ne njandulè ne mwanààbò ne Màndàmù Wood wa bakàji kaaba aka... Kacya ncivwakù mwanji kumòna nànsha umwe wa ku beena fàmiyè wabò to. Musùmbà mujimà wà kùdìbo bàakondopiibwa mu ciinè cikondo aci, biinè abu muntu ne muntu... Mòna's, nudi bamanyè's, ncitùpà cinènè pa lukàmà cyà bantu abu cyàkondopiibwà.

Nènku paanyimà pàà...Cintu cyà pabwàcì mpindyewu: mwanààbò wa bakàji awu, ngákadyàku nendè didyà dyà dilòòlò mu dilòòlò kampànda, mbingu bu yìbidì nàнку kumpàlà kwà cyòcì aci, . . .Kaa, ndwà ku mikùnà kwàka mu Kentucky, ne mèmè—mèmè ndi ànu mumanyè ne yèyè ùvwa ne díyì bu dyà Màndàmù Wood, ne kakùvwa bukénkè bwàbúngì menemene mu cibambalu amu to. Ne byòbi biine ncìvwakù mutùme ntèmà kùdiye to, mvwa, mvwa ntàmba kwakula ne bàyendè, yèyè ùvwa ùlongolola didyà dyà dilòòlò. Ki twètù kupàtuka kuya kasòmba ne twètù kudyà; ki twètù kwalukilamù, mèmè mvwa ngaakula ne bàyendè, kujuuka e kupàtuka kuya pambèlu. Ne Nzambì Udi Mulumbulwishi wanyì wa kàyì tuseku awu mmumanyè ne (mwimàne ku cyambilu eku) ncyàkajingululakù mukàji awu to.

³⁵⁰ Ki díbà adi paanyimà pàà mudimu wà dyondopa mumanè kujika, mèmè kwenza dibìikila dyà ku cyoshelu bwà bangènzàmpèkààtù kunyingalalabò. Wa bwalu mukàji awu ùvwa mwelè mukana be ùCibènga; kàdi kunyingalalayè ne kufilayè mwoyi wèndè kùdì Kilistò, kwelayè cyanza muulu ne ùvwa mwà kulekeleela Kilistò mwoyi wèndè, ne mwikàle ùdila mwadi. Paanyimà pàà dilaabiibwa dyònsò dimanè kuumuka's, mèmè munkaci mwà kwenza dibìikila dyànyì dyà ku cyoshelu, ne bikwàbò. Ki pashìishe kwenzakabì ne nkudimukè, kàdi ki cikèènà-kumòna eci pwà, ne mèmè kumòna mwanààbò wa balùme; bwalu yèyè ùvwa mwanèètù wa bakàji, ewu ùvwa mmwanààbò wa bakàji, ne bònsò pàmwè.

³⁵¹ Ki mèmè kudyàmbidila ne ùvwa mmukàji wa Charlie, bwalu mvwa mumanyè ne pàmvwà musòmbè ku mèèsà ditùkù adi apu, kwà—kwà Charlie kwàka . . .Mukàjèndè mukèsè awu, kakwàcìkwètù kakesè menemene aku, Mukalenge wàkandeeja lutàtù lùvwàye mupetè. Ki kubangila pa dyòdì díbà adi, Mukalenge kulengaYè mubidi wèndè, musòmbè mwaba awu ku mèèsà èndè awu aku mpindyewu. Tony, mwaba wutùvwà awu, kuntwaku, bayè mu kulemba kwà nshìndì. Ki Mukalenge kulengaYè mubidi wèndè ne kuumushaYè cintu cìvwà cikèngela kwikalayè muvwàle eci. . .matùkù èndè ònsò a mwoyi, kuumumushaci pambidi; musòmbè ànu mwaba awu. Pèndè mukàji mukèsè awu ùvwa misangu yònsò ànu ùdìila lwà ku luseke lukwàbò lwà mèèsà, kàdi leelù, ùseemena buludì, ne ùseemeja nkwasà wèndè, ne ùdìila ànu ku luseke lwànyì aku. Kàvwakù mumanyè cìvwàye wènza aci to. Bàyendè musòmbè mùshìndù *ewu*, ne Mwanèètù Banks musòmbè mwaba awu, ne twètù munkaci mwà kuyiikila. Nènku kuseemenayè, ne kwangatayè nkwasà wèndè, kumutèekelayè lwà ku luseke lwànyì eku. Ne cìvwa mmu kiipàcìlà kampànda, Mukalenge kuleejaYè cikèènà-kumòna ànu mwaba awu mene. Ki mèmè kubìikidila bàyendè pambèlu apu, bwalu cìvwa ndisaamà dyà bàna bakàji, ki mèmè kubanga kumulondela cìvwà cyenzèke aci. Kwambayè ne: “Mwanèètù Branham, s'ki mùshìndù wùvwàcì

cyenzèke menemene, ànu nàнку menemene.” Nènku mwaba awu kwambilayè mukajèndè awu, ne Mukalenge kumwondopaYè. Èyo.

³⁵² Nènku pashiishe paanyimà pàà disangisha dimanè kujika dilòòlò adi, ki mukwàbò mwanèètù wa bakàji ewu, mémè kumòna Charles wa mutekète ewu ne mukàji mutekète ewu biikàle pàmwè. Mémè kudyàmbidila ne: “Wàwa ùdi ne cyà kwikala mukajèndè; kàdi mukajèndè yèyè ùtu wa nsùki mitòòkòlòke, kàdi ewu mmukàji wa nsuki mifiike.” Ki kwenzekabi ne mmonè cikèènà-kumòna citentemukila lwà mu ditumba emu. Ne yèyè ùvwa musòmbe mwaba awu ùdikùpula mwìsù ne Mukalenge kuleejaYè cikèènà-kumòna paanyimà pàà yèyè mumanè kwikala . . . dibìikila dyà ku cyoshelu . . . paanyimà pàà disangisha dyà mìlòmbo dimanè kujika, dyondopa dyà babèèdi, ne dibìikila dyà ku cyoshelu dimanè kwenjiibwa, ki Nzambi kwindilaYè too ne pààkanyingalalàye ne kufilayè mwoyi wèndè kùdiYe ne pashiishe kukùdimuka e kumwondopaYè. Nènku mmupetè . . . ntàtù yèndè yivwa mimuujè mubidi munda mwà bidimu. Nènku mmulwè kukèepela bikolè, ne bikwàbò byònsò, mu mùshindù wà ne nànsha mene makàsà èndè àkeela ne minyèngù myaba yivwà byònsò abi bimuumùke (milungù ayi) mu mubidi. Úkaadi údyùmva bîmpè kutàmba mùkaadiyekù mudyùmvwè munda mwà bidimu, nwamònu’s. Ne mùshindù mwinè wùdi Mukalenge ku ngàsà Wèndè udi ukèmesha awu wènta ciinè aci’s wè! Ngeela meeji ne ki mùvwà bwalu abu; kî mmwòmò anyì, Mwanèètù wa bakàji Wood? Ne mùshindù mwinè wùdiYe wènta’s wè! Paanyimà . . . Wamba bishi? [Mwanèètù wa bakàji Wood ùdi wàmba ne: “Mmujiimje bujitu bwà kilò yisàtù lumingu lwàshàadi elu.”—Muf.] Kilò yisàtù mu lumingu lùmwe. Kaa, Yèyè ùdi Nzambi, kî mmwòmò anyì?

³⁵³ Mpindyewu, nènnwàmbilè, címvwà mwambidile Mwanèètù Neville . . . Mvwa ndyàmbidila ne yèyè pàmwàpa ùvwa ne diyiisha bwà dilòòlò edi. Kwambayè ne: “Bwàlà,” kàvwa naadi to. Kàdi mémè ndi ne ndambù wa nkonko mwab’ewu yivwà mishààle, mvwa mudyùmvwè mwenzèjiibwe bwà pa bidì bitàngila nsòmbelu mulenga bwà ndwe mwab’ewu bwà kwandamuna ku nkonko eyi. Pashiishe ndi ne mikwàbò yibidì anyì yisàtù yíngiikalà nciyi pàmwàpa mwà kufika ku yòyi dilòòlò edi to.

³⁵⁴ Ndi muswè kunùleeja yimwè yà kùdiyi mbafùme ku diyifila kùdi muiishi kampànda. Mwanèètù Neville ngwafùmu, anyì, Beeler ngwafùmu ku diyintwàdila. [Mwanèètù Branham ùdi wàndamuna ku nkonko mwandamukùlù yidì yilondà eyi mu Citùpà III, bu nkonko yà nombà 67 too ne ku 74—Muf.]

Mabwe awu àdi àleeja cinyi mu Bwàkabuulwibwà 21.19 ne 20?

Umvwìjàku nyama yinaayi yà mu Bwàkabuulwibwà 5...
Mmuswè kwamba 6; kí m'Bwàkabuulwibwà 5 to, nyí6, ngeela meeji.

Ne bakùlù makùmi àbìdì ne bànaayi mbanganyi?

Mwonjì mukùnze wà mu Genèsè 38 awu wùvwa wùmvwija cinyi?

Nkwèpi kùdì kùkèngelà kutùma mapà pa bìdì bitàngilà lufù lwà bantèmù bàbìdì abu, mu Bwàkabuulwibwà 11?

Bansantu nebìikalè penyì paanyimà pàà bukòokeshi bwà bidimu cinunu? Ne mmubidi wà mushindù kaayi wikalàbo naawù?

Mmunyi mutwàlumbulwishà banjèlo?

Nsuki yidì yilwa cinyi bwà banjèlò bàà mu Kolintò wa Kumpàla?

³⁵⁵ Nwènú bàdì bàmba bwà yà mímpe's, s'ki yà mímpe nyôyi ayi. Pàmwápa ncyákufika ku yôyi ayi dilòlò edi to, kàdi bu Mukalenge mwà kwanyisha, nènteetè bwà kuyàngata musangu wàlondà wutwàlwà bwà cyôci aci.

³⁵⁶ Ndi ne yà mímpe menemene kaaba aka dilòlò edi; pa nanku netùsambilè ànu cyanàànà mpindyewu bwà kulòmba Mukalenge bwà kutùkwàcisha, ne netùbwelemu buludì munda mwà tusunsa, kàà, makùmi àsàtù, anyi makùmi ànaayi tùdì tùlondà etu.

³⁵⁷ Mpindyewu, Taatù wa mu Dyulu mubènèshìibwe, tudi ne kusàkidila Kùdì bwà byònsò biWàtwènzèdì. Nènku, kaa, bìdì bikemesha be mùdì ngàsà Webè ùpweka too ne kutùdì. Ndi ngeela meeji mpindyewu, ku dilòlò adi, mwena dyànyi mukèsè awu, kaa, ùsaama bikolè, ne Wèwè kubwela mu cyalu. Mubidi luuyà wèndè kubangawù kupweka kubangila ànu pa dībà adi mene, ne mmujikè ànu wònsò mpindyewu. Ndi nKwela twasàkidila. Nènku...ndi ànu ndòmba bwà Wìkalèku ne muntu yònsò udi mufile dilòmba dilòlò edi. Ne tudi tumanya ànu kakesè, pàdì bwalu kabùyì butùkwàte twètù mu nzùbù mwètù to, cidìci cyùmvwija, kaadisambila kakesè. Éyi Nzambi, cidì...mùshindù mwìnè—mùshindù mwìnè w'Udì ulwa wa cyà bushùwà's wè. Mu dībà dyàdisàkà ngàngàbukà kule adi, wàmba ne: "Ncyèna mumanyè to, kàcya ncutukù mwanjì kumòna cintu cyènza bu eci to," ne dībà adi Mukalenge Yesù ùmba ùmata mu cyalu.

³⁵⁸ Éyi Nzambi wa yààyà, Wèwè's udi wa cyà bushùwà kutùdì, ne twètù tudi ne disànka dīngi bwà bwalu abu. Tudi tulòmba bwà Ùtùfwilèku luse ku ngiikàdìlù yètù yà lulèngù, ne ngiikàdìlù yètù yà mikùtākàne ayi. Nènku, kaa, watùvulukakù, Mukalenge, ne tudi mubidi wa buntu mu buloba bùdì mīdimà, buloba bwa mifitù ne mpèkaatù ne cimvundù cinène. Ne tudi tutàngidila mu cibwikilu kampànda, mutùdì mwà kwamba's, pa mpàlà yètù, ne

tudi tumòna ne tumanya ànu mu buntu pànwapa. Kàdi dînga ditùkù pùumuishiibwà cibwikilu aci, netùKumònè mpàla ne mpàla ne netùmanyè mutùdi bamanyìibwe. Adi ki ditùkù ditùdi tujinga ne mwoyi mujimà.

³⁵⁹ Tudi tulomba Taatù, mpindyewu, bwà Ùtùkwàcishèku patùdi tuteeta bwà kupèèsha bantu Dîyi dyà Nzambi apa, bilondèshile malòmbà àbò. Tùmùshèku bubèèdi bwònsò. Tudi Neebè dijinga, Mukalenge. Nènku tudi tulòmbakù bwà Watwenzelaci. Luse Lwebè lùtùpèèbwèku, bwalu tudi tulòmba nùnkù mu Dîna dyà Yesù. Amen.

³⁶⁰ Mpindyewu, mu dyandamuna dyà nkonko, mèmè ncyèna udi mutàmbe bwìmpè mu ditùnga to, nudi bamanyè's. Kàdi nêngàdamunè ànu ku dyànyì pàànyì dimanya.

³⁶¹ Lùmvwà mubangè naalù dilòlò adi ndwòlò elu, kàdi kukèngelabì bwà mèmè kwimanyika:

60. “Ku Nyumà umwe nkutùdi bònsò babàtiìjibwe mu mubidi wà Kilistò.” (S'nudi bònsò bavùlùke ne pa lukonko alu ki pâmvwà nsanganyibwa. Mpindyewu aci cidi cìsanganyibwa, mu bushùwà bwà bwalu, mu Kolintò wa Kumpàla 12)...**Pa dîbà ditùdi...tupeta dilediibwa dipyadipyà, eci ncidi cyènzekà. Ng'eci...Eci ki Dibàtiiza dyà Nyumà Mwìmpè anyì, anyì kùdi dibàtiiza dilwalwà pashiishe, anyì ndyujibwa?**

³⁶² Mpindyewu, alu s'ndukonko ànu lwà menemene, ne tudi bafwànyine kupicishila dîbà dyètù dyònsò didi dishààla ànu pa lwòlò alu, bwà dilòlò edì ne màalabà dilòlò ne bikwàbò. Ndufwànyine kwangata...ndufwànyine—ndufwànyine kwangata ne kuswikakaja Bible mujimà. Mufùndu wònsò wùdi ne cyà kuswikakana mu mùshindù mukùmbànàngàne ne mukwàbò Mufùndu mu Bible.

³⁶³ Kàdi ànu bwà kuteetakù kucìvwija mu cikòsò, citòòke tòò mùndi pàànyì mumanyè mwà kucyènza amu, to; paùdi witabuuja Mukalenge Yesù Kilistò, dîbà adi udi upeta dilediibwa dipyadipyà. Paùdi witabuuja Mukalenge, udi upeta meeji mapyamàpyà, mwoyi mupyamùpyà, kàdi kí n'Dibàtiiza dyà Nyumà Mwìmpè nànsha. Nwamònu anyì? Udi upeta dilediibwa dipyadipyà paùdi witabuuja, udi upeta Mwoyi wa Cyendèlèlèlè. Ndipà dyà Nzambi didi dikupèèsha ku ngàsà mudishikàmìne ku diitaba dyà dipà didi Nzambi ùkupèèsha. “Ewu—ewu udi umvwa Méyi Àànyì ne witabuuja Yêyè udi muNtùme, ùdi ne Mwoyi wà Cyendèlèlèlè.” Udi ne Mwoyi wà kashidi; ki dilediibwa dipyadipyà ndyòdi adi, udi mukùdimùne mucima, mbwena kwamba ne udi “mukùdimùke.”

³⁶⁴ Kàdi Dibàtiiza dyà Nyumà Mwìmpè didi dikubweja mu mubidi wà Kilistò, mwikàle ukòòkela mapà bwà mudimu. Kacyèna cikuvwija mutàmbe kwikala mwena Kilistò to, cidi

cikubweja ànu mu mubidi wà mapà cyaààà. Nwamònu anyi? “Mpindyewu, ku Nyumà umwe” (Kolintò wa Kumpàla 12) “nkutùdì bônso babàtìjìibwe mu mubidi wùmwe. Mpindyewu,” mùdì Pòlò wàmba, “kùdì mapà mashìilàngàne, ne mu mubidi ewu mùdì mapà citèema a Nyumà.” Nènku mu mubidi ewu. . . Bìdì bikèngela ùbatìjìibwè mu mubidi bwà wèwè kwikala ne òmòwè dyà ku mapà aa. Àdì àlwa pàmwè ne mubidi.

³⁶⁵ Kàdì, mpindyewu, bwà bìdì bitàngilà kwikala ne Mwoyi wa Cyendèlèlè ne kwikala mwena Kilistò, udi mwena Kilistò dībà dyùdì wìtabuuja adi. Mpindyewu, aci kī nkwitabuuja byà budìngìbudìngì to, nkwitabuuja Mukalenge Yesù mu bulelèlè ne kuMwitaba bu Musùngidi webè sungasunga; udi uledìibwa cyàkàbìdì mwaba awu mene, ne udi ne Mwoyi wà Cyendèlèlè. Nzambi ùdì ùbwela munda mwèbè.

³⁶⁶ Mpindyewu tàngilàayi, Mwoyi wa Cyendèlèlè; Yesù wàkamba ne: “Ewu udi umvwa Méyì Àànyì ne wìtabuuja Yèyè udi muNtùme, ùdì ne Mwoyi wà Cyendèlèlè, ne kààkupìcila ku cilumbulwidi to kàdì wàmányì kuumuka ku lufù wàyi ku Mwoyi.” Udi cifukìibwà cipyacipyà ànu apu. Pashìishe Pòlò wàkatuutakeena ne bàmwe bàà ku bantu abu, mu Byenzedi 19. Bàvwa ne muyiishi kuntwaku uvwa mwakwidyanganyi mukùdìmùne mucima dìnà dyèndè Apòlò. Ne Apòlò ùvwa muntu wa bukòlè mu Mifundu, ne ùvwa ùjaadikilangana ku Mifundu ne Yesù ùvwa Kilistò. Nwamònu anyi?

³⁶⁷ Mpindyewu tàngilàayi. Apòlò, ku Dìyì, ùvwa ùjaadikilangana ku Dìyì. “Dìitabuuja didì difùma ku dyumvwa, dyumvwa dyà Dìyì. Ewu udi umvwa Dìyì Dyànyì, ne wìtabuuja Yèyè udi muNtùme, ùdì ne mwoyi wà kashidi.” Nwacyùmvù anyi? Apòlò, ku Dìyì, ùvwa ùjaadikilangana. Ne bòbò aba bàvwa beena Kilistò, bàvwa balondi, bayiidi. Ne Apòlò ùvwa ùjaadikilangana ku Dìyì ne, Yesù ùvwa Kilistò. Ne bàvwa ne disànka dinène ne bààkaakidila Dìyì, cìbì biikàle bamanyè ànu dibàtiiza dyà Yone.

³⁶⁸ Kàdì pàvwà Pòlò upìcila ku nseke mitùmbùkè yà Efèsò, kusanaganayè bayiidi aba ne kwambayè ne: “Nukàadi bapetè Nyumà Mwìmpè *kacya* nwìtabuuja anyi?” Nwamònu anyi?

³⁶⁹ Mpindyewu, paùdì wìtabuuja, Yesù wàkamba ne: “Udi ne Mwoyi wà Cyendèlèlè.” Ki dilediibwa dipyadìpyà ndyòdì adi. Kì dikudimuna dyèbè dyà mucima ndyòdì adi, dishintuluka. Kàdì Dibàtiiza dyà Nyumà Mwìmpè mbukòlè bwà Nzambi mùdì mubàtìjìibwemù ne ukòòkela mapà a Nyumà citèemà aa bwà kukwàtawù mudimu munda mwèbè; bu mùdì: kuyiisha, batangadiki, bapostòlò, bampaasàtà, baprófetà, . . . ne mapà ònsò a mubidi àdì àbwela mu wòwò aa, paùdì ubàtìjìibwa mu mubidi ewu. Nenku aci cìdì. . . kacyèna cikuvwija mutàmbe kwikala mwena Kilistò to, cìdì ànu cikutèeka bilondèshile myaba mu mwaba kampàndà bwà kwikala nyumà mukwàcishi

mu Èkèleeziyà wa Nzambi udi ne mwoyi. Mpindyewu nwacyùmùvù anyi? Nwamònu anyi?

³⁷⁰ Mpindyewu lukonko lùdi ne...Tùyändàmùnaayi ànu ku lùmwè ku lùmwè, kùdi nkonko yisàtù.

“Ku Nyuma umwe nkutùdi bônso babàtìijìbwe mu mubidi wà Kilistò.”

Aci mmu cyôci, Kolintò wa Kumpàla 12 ngwafila dyandamuna ku cyôci aci. Èyo.

Pa díbà ditùdi tupeta dilediibwa dipyadìpyà adi apu, ki pàdi cyôci eci cyenzeka anyi? Aci ndíbà kaayi?

³⁷¹ Ki cidìbo baswè kumanya ncyôci aci, èyowà...“Ku Nyumà umwe...” To. To. “Ku Nyuma umwe nkutùdi bônso babàtìijìbwe mu mubidi wùmwe.” Nwamonu’s, apu kî mpàdi dilediibwa dipyadìpyà dibanga to, dilediibwa dipyadìpyà dìdi dibanga paùdi *witabuuja* Mukalenge Yesù.

³⁷² Mpindyewu nwamònu’s, kakwènakù...kakwènakù cintu nànsha cimwè...Mpindyewu tèelejàayi. Cyùdi mwà kwenza pa kuumusha kwitabuuja ncinyi? Ncinyi cikwàbò cyùdi mwà kwenza? Ncinyi cikwàbò cyùdi mwà kwenza pa kuumusha ànu kuciitabuuja cyanààna? Ngambilèbi tǔng cintu cimwèpelè cyùdiku wèwè mufwànyine kwenza. Kakwèna cintu nànsha cimwè cyùdiku wèwè mwà kwenza pa kuumusha kuCìitabuuja to. Mpindyewu, cintu nànsha cimwè cilwè pambèlù pàa kwitabuuja kwèbè, kî ncintu cyà wèwè mudyènzèle to, ncyenzedi cyà kùdi Nzambi. Ki bwà cinyi... .

³⁷³ Mpindyewu bu twètù mwà kwamba ne paùdi...Misangu yàbúngi nkàadi mumòne, misangu yàbúngi, bantu biitabuuja “cileeji cyà mbangilu cyà dyakula dyà mu myakulu” bu ne ki Nyumà Mwímpè. Ne mǐngà misangu bànyùkusha bantu, anyi bàbàtuuta bintu ne bàbàtuuta tuumapì, bàmba ne: “Cyàmbè. Cyàmbè. Cyàmbè. Cyàmbè.” Nudi bamanyè’s, bàmba mwakù bàwàmbulula. “Cyàmbè Cyàmbè. Cyàmbè.” Nwamònu’s, aci ncintu cyùdi udyènzela. Ne—ne—ne kaciyi...kaciyi... kaciyi—kaciyi cintu nànsha cimwè to. Udi mufwànyine kupeta dibwejakaja dyà myakulu. Udi mufwànyine kupeta bi—bintu búngi cyanààna, ne masaluka. Kàdi cintu cyôci cilwè pambèlù pàa diitabuuja dyèbè sungasunga, cìdi ne cyà kwikala dipà dyà kùdi Nzambi dikupèèsha. Nwamònu anyi?

³⁷⁴ “Ne ku Nyumà umwe nkutùdi bônso babàtìijìbwe mu mubidi wùmwe.” Aci mmwómò, nwamònu’s. Dibàtiiza dyà Nyumà Mwímpè ncyenzedi cishiilàngàne ne dilediibwa dipyadìpyà. Cimwè ndilediibwa, cikwàbò ndibàtiiza. Cimwè cìdi cikutwàdila Mwoyi wà Cyendèlèlèlè, cikwàbò idi cikupèèsha bukolè. Dìdi difila bukolè mu Mwoyi wà Cyendèlèlèlè, nwamònu’s, bwà kukwàta mudimu. Mpindyewu nwacyùmùvù anyi? Mbímpè. Èyo.

³⁷⁵ Mpindyewu lukwàbò ndwòlò elu, lulwè lwibídi, lwà lutàmbe bwimpè ku yímvwà mupeté dilòlòlò adi ayi:

61. Nyumà wa Yesù úvwà penyì matùkù àsàtù àvwà Mubidi Wèndè wùsanganyiibwa mu lukità awu? Nyumà Wèndè úvwà penyì?

³⁷⁶ Mpindyewu, Nyumà Wèndè, bu nwénù mwà kulonda Mifundu, . . . èè, tudi bafwànyine kutwàla myaba yàbùngi. Kàdi, ndi ndìkonka's, nganyi udikù ne Bible? Mwanèètù Stricker, udikù ne Bible anyi? Èyo. Mwanèètù Neville, udikù ne mukwàbò anyi? Mpetèlèku Misambu 16.10. Ne mukwàbò nganyi? Mwanèètù wa bakàji Wood, udikù ne Bible mwaba awu anyi? Èè, Mwanèètù Stricker, (èyo, ewu anyi ewu), mpetèlaayikù Byenzedi 2.27, Byenzedi 2.27.

³⁷⁷ Nènku mpindyewu, cyà kumpàla, pàakafwà Yesù. . . Paùdi ufwà, mubidi wèbè ngùdi wùfwa. Mwakù *lufu* wùdi wùmvwija ne “kutàpuluka,” ànu kutàpuluka ne bananga bèbèbè cyanààna. Kàdi apa Yèyè mmwambè nùнку, mu Yone Munsantu, nshapità wa 11: “Ewu udi umvwa . . .” To . . . Mfwilàayikù luse; amu mmu Yone Munsantu 5.24 ne: “Ewu udi umvwa Méyì Àànyì ùdi ne Mwoyi wà Cyendèlèlèlè.”

³⁷⁸ Yesù wàkambila Martà, uvwa mulwè bwa kutuutakeena Nèndè awu, . . . Yèyè ne: “Bu ne Uvwa mwaba ewu, nùнку mwanèètù wa balùme kí mmufwè to. Kàdi nànsha mpindyewu, cyònsò cyÚdi ulòmbà Nzambi aci, Nzambi neàKupèeshèci.”

³⁷⁹ Yèyè ne: “Mémè ndi Dibìikà dyà ku lufù ne Mwoyi.” Nwamònu anyi? “Ewu udi ungiitabuuja Mémè, nànsha byòbi ne mmufwè, kàdi neikalè ne mwoyi; Ne ewu yònsò udi ne mwoyi ne ungiitabuuja Mémè, kàadyàkufwàku to.”

³⁸⁰ Mpindyewu—mpindyewu, kùdi citùpà cyà ku twètù cìdi kacìyi cìfwa to. Nènku bu mungàfùmu ku dileeja mulongolongo mujimà wà Mifundu, cyònsò cìdi ne ntwàdijilu cìdi ne ndekeelu. Bintu bìdi kabìyi ne ntwàdijilu abi, mbìdi kabìyi ne ndekeelu. Kì bwà cinyi patùdi twitaba Kilistò, Nzambi, tudi tulwa bàna bàà balùme ne bàà bakàji bàà Nzambì, ne Mwoyi wètù kawèna ne ndekeelu to ànu mùdi Mwoyi wà Nzambì kawùyi ne ndekeelu amu; tudi ne wà Cyendèlèlèlè.

³⁸¹ Mpindyewu, mwakù *kashidi*, tudi bawùkenkète. Mwakù *kashidi* wùdi “ncipòlòlò cyà cikondo,” *kashidi ne* (mutwàngaji) *kashidi*. Ne tudi basangàne kaaba aka ne cìdi ne—cìdi ne ndekeelu, ànu mùdi makènga ònsò aa, ne bubèèdi bwònsò, ne tunyinganyinga twònsò, ne dinyookiibwa dyònsò, ne ifèrnò yèyè mwinè ùdi ne ndekeelu.

³⁸² Kàdi Mwoyi wa Cyendèlèlèlè kawèna ne ndekeelu to, bwalu kaWùvwà ne ntwàdijilu to. KaWènakù mwà kufwà to bwalu kaWùtukù mulediibwe to. KaWùvwakù ne ntwàdijilu wa matùkù to, kaWènakù ne ndekeelu wa cikondo to. Mpindyewu,

mùshindù wùmwèpelè wutùdiku mwà kwikala ne mwoyi Cyendèlèlè, mmu kupeta kwà cintu kampàndà cìdì cyà Cyendèlèlè. Ne Nzambi ùvwakù; kumpàlà kwà kwikalakù cintu kanà cyònsò eci, cìvwa n'Nzambi. Kacya Nzambi kàvwakù ne ntwàdijilu anyi ne ndekeelu to.

³⁸³ Ne Nzambi ùvwa Nyumà munène ewu. TwâMufwànyikiji ne—ne meekala mwandamutekètè a mwanzankòngòlò udi ubwikila. . . Citùpà cyà cijèngù aci mu bushùwà bwà bwalu cìvwa cifwànyine kubwikila buloba bu ne kacìvwa cilengè buloba to. Cìdì ànu mmàyi mu cijèngù cyà mfùdiilu wa buloba, ôwò ngàdi àcyènza. Kàdi, mpindyewu, bu mùdi Nzambi wa Cyendèlèlè, ne Yèyè ùvwa Mupwàngàne awu: dinanga dipwàngàne, ditalala dipwàngàne, disànka dipwàngàne, disànkishiibwa dipwàngàne. Nyumà yònsò mwandamutekète ayi (mutùdi tuyipeta mu Bwàkabuulwibwà amu), yàkapàtuka; yàkènjiibwa Nzambi, yìvwa bupwàngàne. Cintu cikwàbò cyònsò pambèlù pàà cyòcì aci cìvwa ncintu cìvwa cinyangàkàjiiibwe kuumukila ku Aci.

³⁸⁴ Mpindyewu mùshindù wùmwèpelè wutùdiku mwà kwalukila ku bupwàngàne, ngwà kwalukila ne Cyòcì aci (bupwàngàne, bùdì Nzambi abu). Pashiishe tudi tulwa ku bupwàngàne, dìbà adi tudi ne Mwoyi wà Cyendèlèlè; katùyi ne ndekeelu, anyi katùyi—katùyi ne cintu nànsha cìmwè to, cìdì ànu Mwoyi wà Cyendèlèlè bwà kashidi.

³⁸⁵ Mpindyewu yèyè ùdi wàkula bwà musùkà. . . nyumà. Bwalu tudi twambula mibidi yètù tuya naayi ku lukità lwà udi mutàmbe bunsantu wa kutùdi awu, bwà mubidi ewu. Nènku mubidi. . . Ku ntwàdijilu, pàvwà Nzambi, Logos wàkapàtuka mu Nzambi awu. . .

³⁸⁶ Anyi, mungăcikenkèci, Kàtòlikè ùdi ùCibiikila ne, “buumwànà wa Nzambi bwà Cyendèlèlè.” Pààbi, mungămbi kumpàla amu, mwakù awu kawèna mene wùmvwika wà meeji to. Nwamònu's, kakwèna mwà kwikala mwànà wa Cyendèlèlè to, bwalu bìvwa bikèngela bwà mwànà kwikalayè ne ntwàdijilu. Ne pa nàнку Yesù ùvwa ne ntwàdijilu, Nzambi kàvwa ne ntwàdijilu to. Nwamònu anyi? Kàdi Mwànà ùvwa. . . kàvwa buumwànà bwà Cyendèlèlè to, kàdi Mwànà ùvwa ne Taatù ku cibangidilu awu ùvwa n'Logos wàkapàtuka munda mwà Nzambi awu.

³⁸⁷ Nènku ùvwa n'tèòfànì wa Nzambi wàkapàtuka awu. Mmwènekelu wa buntu uvwa kàyi ne mèsù munùdi numòna amu to; dísù ditàmbe bwìmpè. Kàvwa ne macì munùdi nuumvwa emu to, kàdi dyumvwa ditàmbe kule ne kule. Nwamònu's, Ùvwa n'tèòfànì, mu mùshindù wà ne, mwanzankòngòlò wònsò ewu wàkenza bu udi mupwèkè milongo mubwelè mu—mu tèòfànì. Mòsà wàkaCimòna pàakapicilàCì lwà pa lubwebwe mùshindù

ewu. Wàkamòna bitùpà byà paanyimà, yèyè kwamba ne: “Cìvwa cìfwànàngàne ne muntu.”

³⁸⁸ Abraham wàkaMumòna pàvwàYe mutùùlùke mubwelè mu mubidi wà buntu ne mudyè munyìnyì wà kànà kàà ngombe, munwè mabèele, mudyè màntekà. Abraham wàkaMumòna pàcìvwàYe ànu ùcìfùminakù ku dibwelamù, ne pashìshe kuumukamù e kujìmina buludì. Twàsanganyi ne mibidi yètù mmyenza ne bintu dikùmi ne bìsambòmbò byà ku buloba, byàkasangishiibwa ànu pàmwè cyanààna. Nènku Nzambi wàkabisanga pàmwè, ne kwela Banjèlò bàbìdì mu mibidi ayi; Banjèlò bààkiimanà ne kwakula. Ne Banjèlò bàvwa bantu cikondo. . . mu ciinè cikondo aci.

³⁸⁹ Mpindyewu mònaayi, tudi tusangana ne, Melekisedekè ùvwa Nganyi pa kuumusha Nzambi Yèyè mwinè! Kacìvwakù mwà kwikala mungà muntu nànsha umwe to, bwalu Ùvwa Mfùmù wa Salèmà udi Yèlusàlèmà. Kàvwa ní nnè taatù anyi ne maamù to; kàvwa mwà kwikala Yesù to, bwalu Yèyè ùvwa ne taatù ne maamù. Kàvwa ne ntwàdijilu wa matùkù, ne ndekeelu wa mwoyi nànsha; kùdì ànu Umwèpelè udi ne aci, n’Nzambi. Ùvwa n’Nzambi musòmbèle pànwapa mu tèofànì. Nwamònu anyi? Mònaayi, Mfùmù wa Salèmà.

³⁹⁰ Mpindyewu, Nzambi wàkiikalakù ne mwoyi munda mwà cikondo, mu bantu Bèndè. Ùvwa n’Nzambi uvwa mu Davidi, uvwa mumutèeke pa mukùnà, ne bu mfùmù mubèngiibwe, ne kudilayè mwadi. Nyumà umwèumwè awu wàkamwèneshiibwa mu Yesù Mwànà wa Davidi, Wàkabèngiibwa mu Yèlusàlèmà ne wàkadila mwadi awu.

³⁹¹ Yòzefù, musùmbisha ku bìnjànjà byà mfrangà makùmi àsàtù, mukina kùdì mwanààbò wa balùme, munanga kùdì tatwèndè, wàkashikikiibwa ku dyàbalùmè dyà Pàlò, ne muntu nànsha umwe kàyikù mwà kulwa to pa kuumusha ànu mu. . .mupìcile kùdì Yòzefù, ne mpungi ùvwa ùdila ne cinù cyònsò cìvwa cìvwa panshì kumpàlà kwà Yòzefù: cìfwànyikijilu cipwàngàngàne cyà Kilistò. Ùvwa n’Nyumà wa Kilistò musòmbèle munda mwà bantu abu. Nwamònu anyi?

³⁹² Mpindyewu, mpindyewu apa pààkafwà Yesù apu, ùvwa n’Nzambi mumwènèshiibwe mu mubidi. Nzambi wàkalwa muntu. Mu mikenji yà bupikudi, mùshindù wùmwèpelè wùvwàku muntu mwà kupikula bintu bijìmine byà Izàlèlèlà, bìvwa bìkèngela ikalè cilongo. Bìvwa bìkèngela ikalè cilongo cyà pabwìpì. Mukàndà wà Luutà wùdi wùcyùmvwija bilenga menemene; ne bìvwa bìkèngela ikalè cilongo. Pa nànkù bìvwa bìkèngela bwà Nzambi àlwe cilongo kùdì muntu, bwà muntu kumònayè mwà kulwa cilongo kùdì Nzambi. Nwamònu anyi?

³⁹³ Yèyè ùdi ne nyumà munda mwèndè, muntu ùdi nendè pàdiye ùlediibwa, bwalu nnyumà wa mu bufùki. Nnyumà wa pa buloba,

nnyumà wa—wa nzambi wa pa buloba ebu. Yèyè udi ànu mùtòlokù wà Adàmà cyanààna.

³⁹⁴ Muci wùtu wùvulangana. Bukwàmici bùtu bùvulangana. Nyama yìtu yìvulangana. Bantu bàtu bàvulangana. Bòbò mbintu byangacila ku bufùki bwà ku cibangidilu. Nwacyũmvù anyi?

³⁹⁵ Mpindyewu, mpindyewu pàdi muntu ùlediibwa, ùdi ùlediibwa munda mwèndè amu ne nnyumà wa pa buloba. Ki bwà cinyi bìdi bikèngela àlediibwè cyàkàbìdì. Bwalu ewu nnyumà mmufùmìne ku diimiciibwa dyà kùdì taatù ne maamù, cìvwà ciikàle diimiciibwa dyà ku disangila dyà mulùme ne mukàji, ne kakùyì mpatà to yèyè kí mmufwànyine kwikala ne mwoyi kashidi to. Pa nàнку bikèngela àlediibwè cyàkàbìdì. Ne kumpàlà kwà kwenzayè aci, byàkakèngela bwà Nzambi àpwekè pa buloba ne àsebelè njila bwà yèyè kulediibwa cyàkàbìdì; bwalu kàvwa ne mùshindù wà kudipikula yèyè mwìnè to, ùvwa kàyi ne ditèkemena to. Yèyè kàvwa . . .kàyi ne ditèkemena, kàyi ne Nzambi, kàyi ne Kilistò to, pa buloba, mujìmine ne bwèndè butùùke. Yèyè—yèyè . . .kàvwakù ne cìvwàye mwà kwenza nànsha cimwè bwà kudisùngilayè to. Yèyè . . .yònsò . . .Nànsha byòbì ne ùvwa mwakwidi munène, nànsha yèyè mwèpiskòpò, ní ùvwa paapà, cyònsò cìvwàye aci, yèyè mmupìile ànu mùdì muntu yònsò.

³⁹⁶ Pa nàнку, bìvwa bikèngela Kampànda uvwa kàyi mupìile to, bwà àcyènzè. Ne Kampànda umwèpelè uvwa kàyi mupìile ùvwa n'Nzambi Nkààyèndè. Nènku bìvwa bikèngela bwà Nzambi àlwe pa buloba bwà àlwe muntu (ne Wàkalwa mu mmwènekelu wa Kilistò) bwà kushìmika kalonda kàà lufù, bwà kujoomona kalonda kàà lufù, bwà kutùpikula, bwà twètù . . .kakùyì ku byenzedi byètù anyi ku bwìmpè bwètù to (twètù katwèna naabi mene to), kàdi ku ngàsà Wèndè, bwà twètù kusùngidiibwa. Dìbà adi tudì tupeta Mwoyi Wèndè mu mubidi wà cifwàkà ewu, nènku mpindyewu tudì bânà bàà balùmè ne bàà bakàji bàà Nzambi, ne tudì ne Mwoyi wa Cyèndèlèlè munda mwètù. Tudì bânà bàà balùmè ne bàà bakàji bàà Nzambi. Ki bwà cinyi, Yesù, mwikàle ne mwoyi . . .

³⁹⁷ Nènku muntu nànsha umwe, nànsha mwikàle mubì bishi anyi mwìmpè bishi, pàdìbi bikèngela bwà yèyè . . .pàdiye ùshiyangana ne buloba ebu, kí mmufwè to. Ùdi mu mwaba kampànda mukwàbo. Kàdi ùdi ne mwoyi wikalà mwà kubùtuka, paanyimà pàà yèyè mumanè kunyookiibwa mu ifernò bwà byenzedi byèndè, yèyè . . .kàdi nànsha nàнку mwoyi awu wùdi ne cyà kujika. Kùdi mùshindù ànu wùmwèpelè wà Mwoyi wà Cyèndèlèlè.

³⁹⁸ Mpindyewu, tukààdi balongèshe aci. Bu muntu mwà kwikala ngènzàmpèkàatù ne kunyookiibwayè bwà kashidi . . . Kèna mwà kunyookiibwa bwà kashidi to ànu yèyè ne Mwoyi wà Cyèndèlèlè. Piikalaye ne Mwoyi wà Cyèndèlèlè,

s'mmusungìdìibwe. Nwamònu anyi? Pa nàнку kùdi mùshindù ànu wùmwèpelè wà Mwoyi wà Cyendèlèlè, ne ki Zoe, "Mwoyi wà Nzambi." Nènku yèyè kèna mwà kubùtuka to.

³⁹⁹ Kàdi beena lwonji bàdi mu mwaba wà—wà dindila (mu dikèngeshiibwa) dyà dilumbulwishiibwa dyàbò (bwà kulumbulwishiibwabò bilondèshìle byenzi bìdi byenjiibwe mu mubidi) ku ditùkù dyà ndekeelu. Mpindyewu, kàdi tudì. . . mpèkaatù yà bàmwè bantu yidi yìya kumpàlà kwàbò, yà bàmwè yidi yìbàlonda.

⁴⁰⁰ Mpindyewu twètù tutonda mpèkaatu yètù, Yèyè udi mwakàne bwà kutùfwila luse, ki bwà cinyi kabyàkukèngela bwà twètù kupita ku cilumbulwidi cyà Nzambi nànsha. Nwacyũmvù anyi? Tàngilàayi, Loomò 8.1: "Ki bwà cinyi kakwèna mpindyewu dipiila nànsha dimwè bwà aba bàdi mu Kilstò Yesù to." Aba bàdi MU Kilstò. Bàdi buumùke ku lufù bayè ku Mwoyi abu; nwamònu's, katwèna ne dipiila to bwalu tuvwa mu Kilstò Yesù. "Aba bàdi kabayi bènda bilondèshìle mubidi to, kàdi bilondèshìle Nyumà." Nwamònu anyi? "Ewu udi umvwa Mèyi Àanyi, witabuuja Yèyè udi muNtùme, ùdi ne Mwoyi wa Cyendèlèlè."

⁴⁰¹ Ne piikalàbi ne ndi mwiitabiibwe mu Kilstò, ne Kilstò mwangàte dilumbulwisha dyànyi, ne mèmè mwiitabe difuta Dyèndè dyà cibawu bwà mpèkaatù yànyi, mmunyi mùdi Nzambi mwà kundumbulwisha? Yèyè's ùkaadi mumanè kundumbulwisha, pàakalumbulwishàYe Kilstò apu. Dìbà adi ndi musùlùdìibwe ku cilumbulwidi. "Dìbà adi pàNgààmòna Mashì, Nèmpicilè pamutù pèènu." Nwamònu anyi?

⁴⁰² Kàdi, mpindyewu, mwena lwonji kèna yèyè nàнку to. Yèyè ùdi ùbwela mu mwaba wà dikèngeshiibwa. Ne tudì bamanyè ne aci ncilelèlè. Mwena lwonji ùdi ne mwoyi. Ùdi mu mwaba wà dikèngeshiibwa. Ùdi mu mwaba wùdiye kàyi mumanyè. . . Mùshindù awu ki wùdi beena mbùkù aba ne baamwamùlopò bàbìikidisha nyumà yà bantu bàkaadi bafwè eyi, mùshindù kampàndà wà bilèlè byà manayi ne byà bukooyà ne bikwàbò bìdìbo bàlàsula abi, ní nukàadikù bamòne bimwè byà ku byòbi. Èyo. Bwà cinyi? Kabèèna. . .

⁴⁰³ Tàngilàayi Mándèmwàzèlè Piper ewu, kumpàlà kwà kaabwalu kàanyi kàà *Cishimà cyà Donny Morton* aku kupàtukakù. Mbanganyi bàdiku babalè kaabwalu aku? Èyowà, bààbùngì bàà kunùdi mbakàbalè, bushùwà. Ne kàdi mu *Reader's Digest*. Nukààvwakù bamòne anyi? Ànu babwipi ne kòkò aku kupàtukakù, Mándèmwàzèlè Piper wàkapàtuka, mwena lubùkù mutàmbe bunène ukàadi bàà pa buloba bamanyèku kacya awu. Mabèji dikùmi ne àbìdi àkafidiibwa bwà kaabwalu kèndè kalonda aku. Ne munda mwa bidimu makùmi àtaanu. . . Mbayaàyaaye nendè buloba bujimà, ne bileeji byà maalu a mamanya ne bikwàbò byònsò ne, "kakuyi mpatà to yèyè ùdi

ùyiikilangana ne bafwè, ne bantu abu bàdi bàbànda.” Cinyi? Dìna dyà Nzambi kadivwakù ditèèdiibwe musangu nànsha wùmwè to, nî nkanyinganyinga, nî ndyondopa dyà kùdì Nzambi, nî ncinyi pa Cyôci aci, nwamònu’s.

⁴⁰⁴ Cintu cimwèpelè cìvwàku, ànu bantu abu bàakatèèla ne: “John, kwèna mummanyè anyi? Mémè’s ndi George uvwa mu mwaba *kampanda* awu, ne mémè ngwâkenza *bikampànda* ne *bikansanga*. Udikù muvùlùke mwaba wutùvwà bayè bakenzè cikampànda awu anyi?” Nwamònu’s, ki cyònsò cidìbo bamanyè’s. Kwàbò nkumanè kujika. Bayè dyàmwàmwà dyà . . . Kî—kî nkubàshààdìle cintu nànsha cimwè to ànu cilumbulwidi.

⁴⁰⁵ Kùdì mucì mwinàmìne aku, nkwadìshìndilàwu. Ne mu mùshindù wùdì ufwà awu . . . Ki bwà cinyi ntu mpangakanangana ne masambila a bafwè, nwamònu’s, dyakwilangana dyà ne masambila anyi—anyi bwobùmwè bwà bansantu ne bikwàbò. Kabyènakù mwà kwikala nàнку to, bilondèshile Dìyì dyà Nzambi. Kabyèna ne dikwàcìsha nànsha dikesè to bwà kusambidila muntu pàkaadiye mumanè kufwà. Kwèndè nkumanè kujika. Ùdi . . . ùdi ne . . . Ùkaadi musambùke mukàlù pankacì pàà luse ne cilumbulwidi. Anyi mmuyè ku luse, anyi mmuyè kule ne luse. Yesù wàkamba nàнку, mu nshapità wa 16 wa Maatàayi Munsantu, Wà—Wà—Wàkalongesha nàнку; nshapità wa 16 wa Maakò, ngeela meei ne nyèye. Muntu mubanji ne Lazàro; muntu nànsha umwe kèna mwà kusambuka lupòngò elu to, ne kààdyàkulùsambukakù to! Ki bwalu mbwabù’s. Nwamònu anyi? Pa nàнку aci ncikòse bwalu’s.

⁴⁰⁶ Mpindyewu, kadi pàakafwà Kilistò, bivwa bikèngela bwà bintu byònsò kufilabi bujaadiki ne Yèyè ùvwa Kilistò. Mpindyewu tùyaaku ku lukonko lwèbè. Cintu cyà kumpàla, mitootò yàkabènga kukenka, dìbà dyàkabwela, ngondo wàkabènga bwà kufila bukènkè bwèndè, buloba bwàkalùka mabwe ààbù, ku lufù Lwèndè. Ne Yèyè wàkaya kayiisha misùukà yìvwà mu bùlokò, yìvwà kayiì minyingàlale musangu wà lutùulù lwà mu matùkù a Noà ayi. Yèyè, bivwa bikèngela bwà bòbò kujingulula. Tàngilàayi aci! Ne kwòkù ngèmzànpèkààtù ku mpùukàpùukà kaaba aka dilòlò edi, anji elàngànàku meei kakesè pa bwalu abu. Dìngà ditùkù Èvànjeeliyò ùdi utèèleja ùyiishiibwa mpindyewu mene ewu, nebikengelè bwà wèwè kufidila bujaadiki ku Yèyè. Mwaba kampànda wadyàkutwàku cinù panshi, nànsha wèwè mwikàle nganyì. Bìdi mwà kwikala mu bidimu binunu dikùmi kuumukila ku leelù ewu, bìdi mwà kubènga kwenzeka too ne . . . mu dindà. Dìbà dyònsò dìikalàbi adi, wèwè’s wadyàkutwàku ànu cinù panshi mu mwabà kampànda, ne neùmfwè Èvànjeeliyò umwèumwè ewu wàlukila ùyiishiibwa kùdì.

⁴⁰⁷ Bwalu paanyimà pàà misùukà ayi mimanè kwikala mu bùlokò, yìvwà kayiì minyingàlale pàakayiishà Henòkà ne

bakwàbò bônso abu, ne Noà apu. . . ne bwà lutùulù lwà Nzambi, ànu mùdìbi mpindyewu emu, bindile bwà dîbà adi kulwadi. Ne Noà ne Henòkà ne bakwàbò bônso abu bààkayiisha, kàdi bantu abu bààkabàseka ne bààkabèèlulwila. Nènku bàvwa mu nzùbu wa lukànu, ne Yesù wàkaya kayiisha misùùkà yìvwà mu bùlokò ayi. Yèyè wàkafila bujaadiki! Maulu àkafila bujaadiki ne ùvwa n'Yèyè, buloba bwàkafila bujaadiki ne ùvwa n'Yèyè, ìfèrnò wàkafila bujaadiki ne ùvwa n'Yèyè!

408 Bible mmwambè ne cìdi. . . Davidi, kùkaadi bidimu byàbùngì, mu Misambu. . . Èyo, Mwanèètù, balà Misambu, bu wèwè mwà kuswà mwaba awu. Misambu 16.10: [Mwanèètù Neville ùdi ùbala Mufundu—Muf.]

[Bwalu kwàkushìya musùùkà wànyì mu ìfèrnò; anyì kwàkwitaba bwà Wa Cijila webè àmonè dibola nànsha.]

409 Balà cintu cìmwècìmwè aci, mwanèètù, mwaba wàkayiishà Peetèlò awu, mu Byenzedi, nshapità mwi2, mvensà wa 27. [Mwanèètù Stricker ùdi ùbala Mufundu—Muf.]

[Bwalu kwàkushìya musùùkà wànyì mu ìfèrnò, anyì kwàkwitaba bwà Wa Cijila webè àmonè dibola nànsha.]

410 Balà mvensà yìbìdì kumutù kwàcì aku, mwanèètù, bwà wamòna mwà kupeta dyumvwija dyàci.

[Bwalu Davidi ùdi wàmba bwà bwalu Bwèndè ne, ngàkadyànjila kumòna Mukalenge misangu yònsò kumpàlà kwànyì, bwalu yèyè ùdi ku dyà dyàbalùme dyànyì, bwà ncìnyungishiibu nànsha:]

[Ki bwà cinyì mwoyi wànyì wàkasànka, ne ludìmi lwànyì lùvwa ne disànka; kàbìdì mubidi wànyì newìkishè mu ditèkemena:]

[Bwalu kwàkushìya musùùkà wànyì mu ìfèrnò, anyì kwàkwitaba bwà Wa Cijila webè àmonè dibola nànsha.]

411 Balààku mpindyewu mvensà udi ulonda awu,

[Wèwè udi mummanyishe njila yà mwoyi; neùnguujè tètè ne disànka ne lukebu lwèbè.]

412 Èyowà, mònaayi. Mpindyewu, wèwè mulundà wanyì Ntèmù wa Yèhowàh, ndi muswè nkwelèku lukonko pa bwalu abu. Wamònu anyi? Pìikalàbi ne ìfèrnò mmwaba, Ngenà, Mwaba wà bafwè, mwònsò muwàswà kucibùkila amu, pìikalàbi ne aci cìdi cìjikila mu lukità, kàdi mbwà cinyì Yèyè wàkamba ne: “Ncyàkushìya musùùka Wànyì mu ìfèrnò, anyì ncyàkwitaba bwà Wa Cijila Webè àmonè dibola”? Udi wamba bishi bwà aci nànkù? Nwamònu anyi?

413 S'ki Mubidi Wèndè wùvwà apa ewu, mu lukità; ne musùùkà Wèndè mwikàle mu ìfèrnò, munkaci mwà kuyiisha, mwikàle ne mwoyi! Kàdi bishi bwà aci nànkù? Ùkaavwa cyàkàbìdì mu tèofàní Wèndè. Musùùkà Wèndè wùvwa kwàka ne bantu bàvwa

pààbò mu tèòfànì abu. Ne mwikàle ùbàpèèsha bujaadiki ne, bóbò “kabààkanyingalala mu lutùùlù amu to.”

414 Yèyè... Mu ngaakwilù mukwàbò, Wàkakookola ku ciibi. Ne pàakunzulukà ciibi, ne misùùkà yònsò yàkanyingalalà ayi, Wàkamba ne: “Ndi Dimiinu dya mukàji adi. Ndi Ewu uvwa Henòkà ewu...” Mu mpàlàdizù mwàmwa, mu mukwàbò mwaba. Mpindyewu, kanùjimijikù myaba yìsàtù ayi to: mwaba wà beena lwonji, mwaba wà baakàne, ne ifernò yèyè mwinè. Nwamònu anyi?

415 Ànu mùdì búsàtù bwà mu Dyulu abu, bu mùdì: Taatù, Mwànà, ne Nyumà Mwímpè. Bu mùdì búsàtù bwà nyama wa lwonji: mupròfetà wa mashimi, nyama wa lwonji, ne—ne cimanyinu cyà nyama wa lwonji. Nènku byònsò abi, vùlukàayi ne, byònsò abi bìdì mu búsàtù. Búsàtù bùdì bwènza ùmwè, mupwàngaja. Ùmwè mmupwàngaja. Wèwè udi mupwàngaja, ùmwè mu isàtù: musùùkà, mubidi, ne nyumà; màyi, mashi, ne tujilujilu twà mutù. Nwamònu’s, cyònsò cyùvwà aci, bìdì bikèngela bwà wàngatè isàtù bwà kwenza ùmwè mupwàngaja. Angàtà kapese kàà lumwènù kàà matumba àsàtù ne ùtwepù nsèsà yà dībà, udi upeta mwanzankóngòlò mupwàngaja. Nwamònu’s, byònsò, bikèngela wikalè ne isàtù bwà kwenza ùmwè mupwàngàne.

416 Nènku mpindyewu, vùlukàayi ne, pààkafwàYe, Wàkanji kuya dyàmbedi kayiisha misùùkà yìvwà kayiyi mu bùlokò... yìvwà mu buloko ayi, ne wàkafila bujaadiki ne Yèyè nguvwa “Dimiinu dya mukàji” adi. Yèyè nguvwa “Ewu uvwa Henòkà mumòne ùlwa ne binunu dikùmi byà bansantu Bèndè awu.” Byàkàkèngela bwà Àfilè bujaadiki bwà Mifùndù yàkayiishiibwà kùdì Noà, ne kùdì Henòkà ayi, ne kùdì baakàne ne, “Ùvwà n’Yèyè awu.” Bivwa bikèngela bwà bintu byònsò bìCjingùlùlè!

417 Pashiishe Yèyè wàkabànda mu ifernò, ne wàkapeta nsapi yà lufù ne ya ifernò kùdì dyabùlù.

418 Wàkaalukila kuulu aku e kubwela mu Mpàlàdiizò; ne kulwa ne Abraham, Izàkà, ne Yakòbò, ne baakàne abu; ne wàkabiika ku lufù (Maatàayi 27), ne bààkapátuka mu lukità ne bààkabwela mu cimenga, ne bààkamwènekela bantu bàvwà bènda mu mùsèèsù. Àlèluuyàh! Ki bwalu mbwabù’s!

419 Mpindyewu, kàdì mubidi Wèndè... Pàcìvwà musùùkà Wèndè apa munkaci mwà kufila bujaadiki kùdì bajimine, mwinshì emu munkaci mwà kunyènga dyabùlù nsapi, ne wàlukila ne ùlwa ne Abraham ne Izàkà apu; musùùkà Wèndè wùvwà mulààdika mu... musùùkà Wèndè wùvwà mwinshì mwàmwa wùbyènza, ne mubidi Wèndè mulààdika mu lukità. Ki bwà cinyi Yesù wàkamba... Bantu bàtu bamba ne: “Ee, bwà cinyi Yesù ùdì wamba ne: ‘Matùkù àsàtù, Mèmè nèngùjuulè. Mu matùkù àsàtù Mèmè nèmbiikè ku lufù.’? Yèyè—Yèyè’s wàkafwà

mu diitânù mu mapingaja, mubiike ku lufù mu dindà dyà dyàlumingu.”

⁴²⁰ Kàdi tàngilàayi, cìwva “*munda mwà* matùkù àsàtù,” bu nwênù mwà kwikala ne nkòngamyakù. Bwalu Yèyè ùwva mumanyè ne Davìdi, mu dilaabiibwa (dyà dilaabiibwa dyà Nyumà Mwîmpè), wàkamba ne: “Ncyàkwanyishakù bwà Wa Cijila Wanyì àmonè dibola nànsha.” Yèyè’s ùwva mumanyè ne aci cìwva Bwèndè Yèyè. Ùwva mumanyè ne aci cìwva cìMwamba Yèyè. Yèyè nguvva Wa Cijila wa Nzambì awu, ne Ùwva mumanyè ne dibola ditu dibanga munda mwà mèbà makùmi mwandamutekètè ne àbìdi. Mwaba kampànda munda mwà matùkù àsàtù awu, Yèyè uvva úpatukamù, bwalu Mifùndu kayèèna mwà kunyangakajiibwa nànsha.

⁴²¹ Ne mulayi ne mulayi wònsò Mwômù amu ùdi muntàngile mémè ne mukutàngile wèwè, ngwètù!

⁴²² Yèyè kwamba ne: “Shimbùlaayi mubidi ewu, ne Mémè nèngùjuulè mu matùkù àsàtù.” Bwalu Yèyè wàkamba ne: “Ncyàkulekela musùukà Wányì mu ifernò, anyì ncyàkwitaba bwà Wa Cijila Wanyì àmonè dibola nànsha.”

⁴²³ Ùwva mumanyè ne, mu matùkù àsàtù mubidi awu wùwva wùpàtukamù. Yèyè kààkashàalamù matùkù àsàtù bulubulu nànsha. To, mukalenge, Kààkashàalamù to nànsha kakesè. Yèyè wàkashàalamù ànu kuumukila ku diitânù mu mapingaja too ne mu dyàlumingu mu dindà, kabùlù kàà mashi nànsha kàmwè kàkavwakù kafwànyine kubola nànsha.

⁴²⁴ Ne Yèyè ùwva mufwè, mwela manga a dibènga-kubola, ne ùwva mulaadika . . . anyì mujìngila mu cilàmbà, ne mulaadika mu majambu. Mu ditùnga adi dyà luuyà lukolè, dyà bisènsè, kwenza ànu ndambù wa mèbà cyanààna Yèyè’s ùwva ùbanga kubola. Paùdi ànu ubanga kuteket-. . .kuteketangana, nudi bamanyè’s, mubidi wèndè, dyùlù dyèndè didi dibèetelela ne bikwàbò, dibola dibanga; mu ditùngà dyà luuyà lukolè, dyà citaleela. Nùnkù wòwò’s mmubangè kunyanguka, bwalu wùwva mmubidi. Kàdi Yèyè ùwva mumanyè ne, kumpàlà kwà kabùlù kàà mashi aku kunyangukakù, Nzambi wàkambila mukana mwà Davìdi mupròfeta ne: “Ncyàkwitabakù bwà Wa Cijila Wanyì àmonè dibola nànsha.”

⁴²⁵ Mùshindù mwìnè wàkangataYe Dîyi dyà Nzambì ne kwikala ne mwoyi ku Dyòdi’s wè! Mpindyewu, wònsò wà ku milayi ayi muntwamu wùwva wùMutàngila awu, Nzambi wàkuuja wònsò wà ku yòyi. Ne mulayi wònsò wùdi wùtàngilà mwena kwitabuujja awu, Nzambì neùjè mulayi wònsò wà Cyòci aci. Amen. Shààla ànu ne ditwishiibwa dyònsò ne Cìdi Bulelèlè. Amen. Pa nànkù, musùukà Wèndè. . .

Udi wèwè wela meeji ne bidi. . .To, mfwilaayikù luse. Nyumà wa Yesù ùwva penyì munda mwà matùkù àsàtù àvwà mubidi Wèndè mu majambu awu?

426 Nyumà Wendè ùvwa mu ifernò, mwàmwà mu myaba yà mitàmbe kwikala yà mwinshi ayi; kàdi Yèyè wàkabiika's. Ne ndi mufwànyine kusàkidila kaadíyi kakesè—kakesè mwab'ewu kàdi kafwànyineku kunwàmbulwisha bikolè. PàakabiikàYe ku lufù, Wendè. . . PàakabiikàYe ku bafwè, kakùyi mpatà to Yèyè kàvwakù mwanji kujikija mudimu wà bupikudi to. Ncyà bushùwà. Byàkakèngela bwà kusukulaYè cintu cyònsò mu kaabujimà. Mushinga wùkaavwa mumana kufuta, kàdi bwòwà bwà ifernò abu, bwòwà bwà lukità abu. . . Ne apa, Yèyè—pàakafwàYe, Wàkatùngunuka buludi. Yèyè kàakiimanyikakù kukwàta mudimu pàakafwàYe apu to, Wàkatùngunuka ànu ne kuyiisha! . . . ? . . . Mfwilaayikù luse bwà dyenza dyànyì dyà maalù didì dipangè bupwekèle, ngeela meeji, kàdi Yèyè kàakiimanyikakù to!

427 Wèwè kwàdyàkufwàku to! Mubidi wèbè mmufwànyine kushààla mwikishe bwà cikondo kampànda, kàdi Nzambi neàwùjuulè, Yèyè mmulayè ne Neènzè nàнку. Kadi kwènàku mwà kubùtuka to ànu mùdì Nzambi kàyi mwà kubùtuka amu. Ncyà bushùwà. Tàngilàayi, Wèndè. . . paanyimà pàa Yèyè mumanè kufwà, ku cìvwà. . . mufwè bwà bìvwà bitàngilà bayiidi. Ùvwa mulààle tulù, kí cìvwàYe wenza. Bàvwa baMulààdike tulù; mwàkambàYe bwà Lazàrò amu ne: “Nènye kamubiisha.” Bìvwa bikèngela bwà Nzambi àMubiishè.

428 Tàngilàayi, Wàkatùngunuka ànu ne kwenda kupweka, Wàkatùngunuka ne kuyiisha. Ne Wàkayiisha misùukà yìvwà mu bùlokò emu eyi. Kutùngunuka e kubwela mu ifernò, kunyènga dyabùlù nsapì. Kwalukila buludi ne kuyiisha cyàkàbìdì mu Mpàlàdiizò, ne kubiika ku lufù mu ditùkù diisàtù. Kumwènekela bàpòstòlò Bèndè munda mwà matùkù makùmi ànaayi, ne ku ndekeelu kwà ditùkù dyà makùmi ànàayi, kubàndaYè buludi; bwalu, byònsò bìdì kumutù kwètù abi, miitabuuja a màjimbù ne bikwàbò byònsò abi. . . Wàkakòsa diitabuuja dyònsò dyà màjimbù, mpatà yònsò, ne kwenza nshinga wa disambila kuumukila pa buloba too ne mu Butumbi mu kubànda Kwèndè amu. Wàkabànda ne kuya kasòmba ku dyàbalùmè dyà Mutàmbe Bunène. Mucìmunyi! Mucìmunyi Munène, kakùyi mpatà to. Lufù kalùvwakù mwà kuMulama to! Ifernò kàvwakù mwà kuMulama to! Buloba kabùvwakù mwà kuMulama to!

429 PavwàYe pànu pa buloba, Wàkapèèshiihwa. . . Wàkaya ku cimenga cyà citàmbe kushààdila ne kùdì bantu bàà batàmbe kushààdila, ne kupèèshiihwa dìnà dyà ditàmbe kushààdila. Aci ki cidi muntu mwenzè Bwèndè Yèyè. Wàkaya ku Yelèkò, cimenga cyà citàmbe kushààdila. Byàkakèngela bwà muntu wa mutàmbe bukesè àbandilè kuulu kwà mucì bwà kutàngilayè panshi bwà kuMumòna. Ki kùdì muntu muMutèèke nkòwòku aku. Yèyè ùvwa mwoweshanganyi wa màyi ku makàsà, mudimu wà mutàmbe bubì wùvwaku mufwànyine kupèèshiihwa. Wàkalwa mutàmbe kushààdila. Ne bàakaMwinyika dìnà dyà ditàmbe kushààdila

divwàku difwànyine kupèeshiibwa ne, *Beelèzèbulà*, “mfumù wa baadémons.” Muntu wàkaMupèesha dìnà dyà ditàmbe kushàadila, mwaba wà mutàmbe kushàadila, ne wàkaMutùma mu myaba yà mitàmbe kushàadila yà ifernò wa mutàmbe kushàadila.

⁴³⁰ Nzambì wàkaMubiisha ku lufù ne wàkaMutùma mu Maulu a matàmbe Kutùmbuka, ne Dìnà dyà kumutù kwà dìnà dyònsò. Àlèluuyàh! Mòna’s, bikèngela mene kutàngidilaYè panshì bwà kumòna Dyulu. Nkwasa Webè wa butùmbi mmubàndishiibwe kuulu kwà maulu a Dyulu. Ne bikèngela bwà Dìnà dyà ditàmbe bunènè dikaadiku dipèeshiibwe mu Dyulu ne pa buloba kwikaladi. . . ndìdi diMulamàte. Ki cìvwà Nzambì muMuvwijè. Muntu mmuMutèèke mutàmbe kushàadila, kàdi Nzambì mmuMuvwijè Mutàmbe kutùmbuka. Ki Yèyè awu’s, kuumukila ku mutàmbe kupwekela, too ne ku Mutàmbe kutùmbuka.

⁴³¹ Wàkalwa mutàmbe kushàadila bwà Wàmòna mwà kutùbàndisha kùdi Mutàmbe kutùmbuka. Yèyè wàkalwa twètù, bwà ku ngàsà Wendè twètù twamòna mwà kulwa Yèyè, bàna bàà Nzambì. Ki kwàkayàYe. Amen! Dìnà Dyènde dibeneshiibwè. Wàkasebela njila, bwà twètù pèètù twamòna mwà kulwa, dìngà ditùkù: “Bwalu Mémè ndi ne mwoyi, nwènù pèènu nudi ne mwoyi.”

⁴³² Kaa, kabyèna bikèmesha to. . . Pàdì muntu ùbàkula cìkèèná-kumòna aci, kacya kakùtukù kwanjì kwikala muntu mufwànyine kucyùmvwija to. Bàkaadikù mene bateetètèete kucyùmvwija, bàjìmija ne lungènyi; musambu munène ewu: “Kaa, dinanga dyà Nzambì, mùshindù mwinè wùdidi dibanjike ne dikezùke’s wè! Mùshindù mwinè wùdidi kadiyi kwondola kumana ne dikolè!” Cìtùmìnyi cyà ndekeelu aci. . . anyi ngeela meeji ne cìtùmìnyi cyà ntwàdijilu, cìdi ne: “Bu twètù mwà kuuja mbù tètè ne màyi a mufùndu, Ne bu maulu mavwijìbwe mukàndà muvùnga; . . .” Nudi bamanyè mwaba wùvwàbo bacìsangàne anyi? Cifùnda pa. . . cìmanu mu lùpitàadi lwà babùlùke. Muntu nànsha umwe kèna mwà kuumvwijakù Dinanga dyà Nzambì adi to. Kaa, kaciyènakù mwà kwambiibwa to, bidìYe mutwènzèle abi. Ekèlekèle, mmunyi mùdiku mwà kutèèka didikùmbanyina dìmwèpelè mwòmù amu? Nngàsà Wendè, kuumukila ànu ku ntwàdijilu too ne ku ndekeelu. Mémè mwva mujìmine, mucùmùnnyìibwe, ne nciyi pabwàsà, nciyikù mwìmpè to, cìntu nànsha cìmwè pa bwalu abu, kàdi Yèyè ku ngàsà Wendè kulwa e kutùsùngila. Kaa, ekèlekèle. Ki Dyèndè. . . Ki Mukalenge wanyì nyawù. Ki dinanga Dyèndè ndyòdi adi, ki bwìmpè Bwèndè mbwòbù abu.

⁴³³ Mpindyewu tudi ne tusunsa tutwè ku mwandamutekète ne nkonko mitwè ku dikùmi ne yìtaanu ne. . .

62. Wèwè udikù wela meeji ne mbîmpè bwà bakàji kukwàtabò mudimu wàbò wà nkààyaabò pambèlù pàà èkèleeziyà anyi?

⁴³⁴ Èyowà. Aci cidi ànu ndukonko cyaààà, ànu...kí ndukonko lwà mu Mifundu to, kàdi...Cyà bushùwà, ki mûndi mêmè ngeela meeji. Èyowà's, mukalenge, tudi bônso bakwàcishanganyì mu mudimu. Bakàji bàdi ne yàbò myaba, ne ncyà bushùwà ne bàdi naayi. Èyowà's, mukalenge. Enzà wèwè ànu mudimu wônso wà nkààyeebè wûdi mwà kwenza awu, nènku Nzambi neàkubènèshè bwà wòwù awu.

Èyo, mpindyewu twànji tùmônààiyibi túng:

63. Bu wèwè mwà kuswà umvwijàku búsàtù. Mmunyi mùdiku Mwànà mwà kwikala musòmbe ku dyàbalùmè dyà Taatù, mwikàle wàkwilangana bwà...kùdi Taatù, piikalàbo kabàyi baapèsonà bàbidi?

⁴³⁵ Èè, mulundà wanyì munanga, aci's cidi...aci's—aci's ndibuulula. Piikalàbi ne Yesù wàkamba ne: "Mêmè ne Taatù Wanyì tudi Umwe," díbà adi mmunyi mùdibo mwà kwikala bàbidi? Nwamònu anyi? Mpindyewu, kabèèna bàbidi to.

⁴³⁶ Musangu kampànda mukàji mukwàbò wàkangambila, nènku mêmè mwà ngumvwija cyòci aci, kwambayè ne: "Wèwè ne mukàjèebè nudi—nudi bàbidi, kàdi pààbi's nudi umwe."

⁴³⁷ Mêmè ne: "Kàdi, Nzambi ne Mwànà mbishiilàngàne ne aci, wamònu's." Mêmè ne: "Udi mumòne mêmè anyi?"

"Èyowà."

"Udi mumòne mukàjàànyì anyi?"

"To."

⁴³⁸ Mêmè ne: "Dìbà adi, bwà Taatù ne Mwànà mbishiilàngàne; Yesù wàkamba ne: 'Paùdi muMmòne Mêmè, udi mumòne Taatù.'" Nwamònu anyi?

⁴³⁹ Taatù ne Mwànà...Taatù ùvwa Yèhowàh wa Bukolè bwônso awu (Nzambi) musòmbèle mu ntentà ùbìikidiibwa ne n'Yesù Kilstò, uvwa Mwànà mwela maanyì wa Nzambi. Yesù ùvwa Muntu, Nzambi ùdi Nyumà. Ne muntu nànsha umwe kàtukù mwanji kumòna Nzambi musangu nànsha wùmwe to, kàdi mulela umwe *wa* Taatù ngudi muMwambè patòòke. Yèyè uvwa...Yèyè...Buumùntù Bwèndè, diikalakù Dyèndè, Bunzambi Bwèndè, cyònsò civwàYe aci, Yèyè ùvwa Nzambi! Yèyè kàvwa mushààdile anyi mupite Nzambi ku kantù nànsha kàmwè to. Kàdi pààbi's, Yèyè ùvwa Muntu. Ùvwa Muntu, nzubu uvwa Nzambi musòmbèlemù. Ncyà bushùwà, Ùvwa cisòmbedi cyà Nzambi.

⁴⁴⁰ Mpindyewu, nwènù baswè ndambù wa Mifundu pa bwalu abu: Mwanèètù Neville, bu wèwè mwà kumpetelakù Maakò Munsantu 14.62. Ne wèwè Mwanèètù wa bakàji Wood, mpetèlèku Efèsò 1.20. Muntu mukwàbò ùdikù ne Bible anyi?

Èè, elà cianza muulu. Mwanèètù wa bakàji Arnold, udi nendè kuntwaku anyi? Èyo, mpetèlaaku Byenzedi 7.55. Èyo. Maakò 14.62, Mwanèètu Neville; ne Mwanèètu wa bakàji Wood udi ku Efèsò 1.20; Byenzedi 7.55, Mwanèètu wa bakàji Arnold.

441 Èyo, wámupeci anyi, Mwanèètu Neville? Èyo, balàaku mpindyewu: [Mwanèètu Neville ùdi ùbala Mufundu—Muf.]

[*Ne Yesù wákamba ne: Ndi: ne nenùmonè Mwànà wa muntu musòmbè ku dyàbàlùmè dyà bukolè, ne ùlwa mu matutu a mu dyulu.*]

442 Èyo, mpindyewu, tàngilàayi cyambilu cyà kumpàlà aci. Yesù wákamba ne: “NDI.”

443 “NDI.” NDI awu ùvwa nganyì? Kacya kakùtukù muntu pa buloba bujimà udi mufwànyine kuDyùmvwiya to. Nànsha mene. . .nwènù bàtù bàbàla nkòngamyakù ne bikwàbò, kakùtukù muntu udi mufwànyine kuumvwa. . .Dìdì J-v-h-u. Ne nànsha mene bamanyi bàà mabàlà bàà beena Ebèlù kabàvwakù mwà kuDìshindumuna to. Kaacipuka kàà kàlàkuka kapyà aku, ditùkù adi pàakatwilanganàYe ne Mòsà, Dìvwa J-v-h-u. Pa nànkù bàvwà bàDìshindumuna ne “J-o-h, Jéhovah,” kàdi kaDyèna “Jéhovah” to. J-v-h-u, nwamònu’s, muntu nànsha umwe kì mmumanyè to.

444 Kàdi wèwè udi wamba ne: “Èè, Mòsà kàvwa mwà kuCyùmvwa to.”

445 Yèyè ne: “Ndi mwà kwamba ne nganyì?”

446 Yèyè ne: “Wàmbè ne: ‘NDI’ ngudi mukutùme. NDI.”

447 Mpindyewu mònaayaaku. NDI ndìbà dyà mpindyewu, kaciya “Mvwa” anyi “Nèngikalè” to, NDI. Mpindyewu, Wákamba ne: “Eci necìikalè civùlukilu mu nkòngo yònsò: NDI.”

448 Mpindyewu tàngilàayi Yesù mwimàne kaaba aka ku difestò ditùkù adi. Bòbò ne: “Bwà mpindyewu kaayi twàmanyi ne udi mupàle.” Mèyì a bushùwà nnè: “Udi ne mukupa,” (*Ne mukupa* mbwena kwamba ne “mupàle.”) “Twàmanyi ne udi mupàle. Udi mwena Sàmaalèyà, udi ne démon.” (Yone Munsantu, nshapità mwifó) Ki awu ne: “Mpindyewu, wèwè udi wamba ne udi. . . mumòne Abraham, pèèbè muntu wa bidimu kabìyi bipite pa makùmi àtaanu?” (Ùvwa mufwànyine kumwèka mukolè ndambù bwà cipimu Cyèndè, kàdi Pèndè ne bidimu ànu makùmi àsàtù cyanààna, kàdi mudimu Wèndè mukolè.) Awu ne: “Udi muswè kwamba ne wèwè ewu udi muntu wa bidimu kabìyi bipite pa makùmi àtaanu, kàdi wamba mùdì ‘mumòne Abraham’? Bwà mpindyewu kaayi twàmanyi ne udi mupàle.” Nwamònu anyi?

Yèyè ne: “Kumpàlà kwà Abraham kwikalayèku, NDI.”

449 “NDI,” Yèyè nguvwa NDI munène awu. S’ki Yèyè ewu wàmbila cyàkàbidì beena Yudà aba, nwamònu’s, “NDI! Kàdi

panwàMmònà ndwa ku dyàbalùmè dyà bukolè, . . .” Ncyà bushùwà anyi?

⁴⁵⁰ Cìbalùlùlè, mwanèètù wa balùme, [Mwanèètù Neville ùdi ùbala Mufùndu—Muf.]

[. . . *panwàmònà Mwànà wa muntu musòmbe ku dyàbalùmè dyà bukolè, ne ùlwa mu matutu a mu dyulu.*]

⁴⁵¹ Balààku webè awu mpindyewu, Mwanèètù wa bakàji Wood. [Katùpà kùà mukàbà wà mèyi munda mutupù. Mwanèètù wa bakàji Wood ùdi wàmba ne: “Efèsò 1.20 anyi?”—Muf.] Èyowa’s, mwàbànà. [Mwanèètù wa bakàji Wood ùdi ùbala Mufùndu.]

[*Wàkenzejayè mu Kilistò, pàakamubiùshàye ku bafwè, ne kumutèèka ku dyàbalùmè dyèndè yéyè mwinè mu myaba yà mu dyulu.*]

⁴⁵² Èyo, balààku webè, mwanèètù wa bakàji. Nwamònu’s, Cìdi ànu cyòbì cimwècimwè aci, [Mwanèètù wa bakàji Arnold ùdi ùbala Byenzi 7.55—Muf.]

[*Kàdi yéyè, mwikàle mûle tètè ne Nyumà Mwîmpè, wàkatàngila buludì muulu mu dyulu, ne wàkamòna butùmbì bwà Nzambì, ne Yesù mwimàne ku dyàbalùmè dyà Nzambì,*]

⁴⁵³ Mpindyewu, nudi numòna’s, Yè- . . . Nzambì kàvwa mwà kwikala ne cyanza cinènè cyà dyàbalùmè to, nwamònu’s, ne Yesù mwimàne *ku dyàbalùmè Dyèndè. Dyàbalùmè* mbwena kwamba ne “bukòokeshi.” Nwamònu anyi? Ànu bu cileejilu, ambàayi tũng bu ne mvwa ne bukòokeshi mu kaabujimà bwà èkèleeziyà, anyi ne mvwa mwèpiskòpò wa mùshindù kampànda, ne Mwanèètù Neville kwangatayè kaaba kàanyi, yéyè ùvwa mufwànyine kwikala dyàbalùmè dyànyì. Nwamònu’s, mbwena kwamba ne yéyè udi. . . ùvwa mufwànyine kwikala ku dyàbalùmè dyànyì.

⁴⁵⁴ Mpindyewu, Yesù ùdi ku dyàbalùmè dyà Bukolè. Mpindyewu, Yéyè ùdi wàmba nànkù, mu Efèsò emu, pàdiye ùcyùmvwija apu, Ùdi ku dyàbalùmè dyà Bukolè. “Makòokeshi ònsò mu Maulu ne pa buloba” (mwàkambàYe, paanyimà pàà dibìikà Dyèndè dyà ku lufù) “mmafidiibwe mu byanza Byànyì. Mémè ndi ne bukòokeshi bwònsò mu Maulu ne pa buloba. Ndààyaaku nùkalongèshè bàà mu matùngà ònsò, nubàbàtiiza mu Dìnà dyà Taatù, ne Mwànà, Nyumà Mwîmpè, nubàlongesha bwà kwenzabò bintu byònsò bìNdi munùtumine dîyi abi; mònaayi, Ndi neenù misangu yònsò, too ne ku ndekeelu kwà buloba.”

⁴⁵⁵ “Bukòokeshi bwònsò mu Maulu ne pa buloba.” Aci cìdi penyì. . . Kwòkò nzambì kampànda muulu mwàmwa pa kuumusha Yéyè, yéyè awu kèna ne bukòokeshi to. Nwamònu’s, kí nkufwànyìnekù kwikala Nzambì mukwàbò to. “Makòokeshi ònsò a mu Maulu ne a pa buloba” mmatèèka mu cyanza Cyèndè.

Pa nàнку, nudi numòna's: "Mmwimàne ku dyàbalùme," (mùdi muntu awu mwelè lukonko), kî mbwena kwamba ne. . .

⁴⁵⁶ Mpindyewu tàngilàayi, mubidi. . . Nzambi ùdi Nyumà. Èyowà, mbanganyi bàdi bùmvwà aci? Ambàayi "Amen." Nzambi ùdi Nyumà, Yesù m'Muntu, ne Yesù ùvwà Nzambi muvwijìbwe mubidi. Yesù uvwà. . . Katùvwakù bafwànyine kumòna Nzambi to, nwamònu's, Yèyè n'Nyumà. Kwèna mwà kumòna nyumà to. "Muntu nànsha umwe kàtukù mwanji kumòna Nzambi musangu nànsha wùmwe to." Muntu nànsha umwe kî mmufwànyine kumòna Nzambi to.

⁴⁵⁷ Nènku anyìshaayi ngàmbè nùnkù ewu: "Kanùtuku banji kummòna mèmè ewu to." Kanùtuku banji kummòna to kacya bàànùlela, ne kanwàdyàkummònakù to. Ncyà bushùwà. Nudi numòna mubidi ewu wùdi wùleejà patòoke muntu ewu, udi munda emu ewu. Mpindyewu, mubidi ewu kawèna ne Mwoyi wà Cyendèlèlè to, kàdi nyumà ngudi ne Mwoyi wa Cyendèlèlè. Mubidi ewu newàlukilè, kàdi newùpatukè cyàkàbidi mu cimfwànyì cyàwù, ànu mùdi lutètè lwà blé lùya mu buloba amu. Bwena Kilistò mbushìndàmèene pa dibìikà dyà ku lufù, kî mpa dipingaja dyà cintu pa mwaba wà cikwàbò to. Dibìikà dyà ku lufù; Yesù umwèumwè wákaya mu buloba awu, n'Yesù umwèumwè wàkaalukila. Wèwè muyè mu buloba ne nsukì mikùnze, udi walukila ne nsukì mikùnze; wèwè muyè mu buloba ne nsukì mifiike, udi walukila ne nsukì mifiike. Nwamònu's, ndibìikà dyà ku lufù.

⁴⁵⁸ Wèwè mubangè kudyà. . . Mvwà mukonkè ngàngàbukà cyòci aci, àbidi aa, ngamba ne: "Bwà cinyi pàmvwà ne bidimu dikùmi ne bisambòmbò. . . Dìbà dyònsò dìndì ndyà, s'ndi mvwijulula mwoyi wànyì mupyamùpyà's?"

⁴⁵⁹ Yèyè ne: "Mmwòmò."

⁴⁶⁰ Udi ubweja tubùlù twà mashi tupyatùpyà—tupyatùpyà musangu wònsò wùdi wenza. . . wùdi—wùdi mubidi wenza. . . anyì wùdi cyàkudyà cyènzà tubùlù twà mashi, ne kabùlù kàà mashi aku kàdi kàtàmba kukuvwija ne dikàndà. Ki mùdi wikala ne mwoyi nàнку. Dìbà adi, bikèngela bwà cintu kampànda kufwàci musangu wònsò, bwà wèwè kwikala ne mwoyi. Ditùkù dyònsò, cintu kampànda cidì cifwa: wèwè udyà munyìinyi, ngombe mmufwè; anyì nì ncinyì cyònsò cyùdi udyà aci; mushipa mmufwè; anyì—anyì blé mmufwè, bwà kwenza dyàmpà; cilungà cyà mpàtatà ncifwè, cidì cyènzè cilungà cyà mpàtatà aci; ne. . . mùshindù wònsò wà mwoyi; wèwè udi mwà kwikala ne mwoyi ànu ku cintu cifwè.

⁴⁶¹ Ne udi mwà kwikala ne mwoyi Cyendèlèlè ànu bwalu cintu kampànda ncifwè: Yesù. Kî mbwalu udi mukadìvwijè wa mu èkèleeziyà, kî mbwalu udi mubàtìijìbwe, kî mbwalu udi mujikùle bwena Kilistò to; mbwalu udi mwitàbe Mwoyi wà Yesù Kilistò wùvwà muzolòlòja mashi. . . Mashi àkeediibwà

panshì bwèbè wêwè, ne wêwè kuMwitaba bu Musùngidi webè sungasunga.

⁴⁶² Mpindyewu, mònaayi, ndi nkonka nùнку. Ndi njinga kunùkonka *nwènu* nùнку. Tàngilàayi eci, s'mbilenga be. Pàmwàpa nkàadi mucilongéshe kumpàla (ncyéna mumanyè to) mwaba ewu; mu kuyiisha kwà myaba yònsò, udi upwà mwoyi byùdi mwambè pa . . . mu myaba kampànda. Kàdi, díbà adi, mbwà cinyi bidi . . .

⁴⁶³ Mpindyewu, ngeela meeji, Mwanèètù wa bakàji Smith . . . Ncyéna mumanyè ní mvwakù mumanyè Mwanèètù Fleeman mu ciinè cikondo aci anyi to. Ne Tryphena, ndi mmuvùluka pàvwàye mwànà mukesè wa bakàji. Nudi bamvùlùke mèmè, pancivwà . . . mvwa wa citùpà, mwìpi, munène wa katankù; ne nsuki mifìike, myenzè mabùlámabùulà. Mvwa ne ciibidilu cyà kwenza manàyi a mànkómò. Kaa, mvwa ndyàmbidila ne mvwa muntu wa kapelu pa buloba. “Kaa,” mùmvwà ndyàmbidila, “kakwènakù muntu udi mwà kuncimuna mèmè to. To, mukalenge.” Kadi mèmè—mèmè kudidìnga pa cyòci aci, nudi numòna's. Kadi mèmè . . . Mpindyewu, mèmè kudyàmbidila ànu ne: “Kaa, ekèlekèle.” Mèmè kudyàmbidila ne: “Wèwè muntentèke cintu eci paanyimà, s'ndi mufwànyine kuya ngenda mpweka naaci mùsèsèsù.” Bushùwà's, kakwèna cidi cìntàcishà to. Ne misangu yònsò yìndi ndyà, ndi ntàmba kudyunda ne kupeta makànda díbà dyònsò. Díbà dyònsò dìndi ngeela mwoyi mupyamùpyà munda . . . Mvwa ndyà mbokà, bilùnga byà mpàtatà, ne nkùnde, ne minyìinyi, ànu mûndyadyà leelù ewu emu. Nènku mvwa ntàmba kulwa ne makànda ne ndyunda díbà dyònsò. Kadi pàngàakapetà bidimu bitwè ku makùmi àbìdi ne bitaanu . . .

⁴⁶⁴ Ndi ndyà bìmpè mpindyewu kutàmba byà musangu awu, nwènu bònsò bàdi bammanyè, nudi bamanyè aci. Ndi mwà kudyà bitàmbe bwìmpè mpindyewu, mmutùdyadyà twètù bònsò. Kàdi mbwà cinyi, Mwanèètù Eagan, díbà adi, piikalàbi ne ndi mutùngùnùke ànu ne kudyà byàkudyà bitàmbe bwìmpè, byàbùngì kàbìdi, maavitàminè matàmbe bwìmpè ne bikwàbò byònsò . . . Ne pàndi ntàmba kudyà, ki pàndi ngenda nteketa ku kakesè ku kakesè. Ne mpindyewu nkàadi ndwa muntu mukùlákàji wa makaaya makòbàme, ne mutù dibàla, ne ntòloka mvyà, ne byanza byènda byèla minyèngù, mwìsù mwòndoka, makaaya àpwekelela, mu dìndà binkolela bwà kujuuka pa bulàalù, ne . . . Kaa, ekèlekèle. Bidi nàнку bwà cinyi? Piikalàbi ne ndi mvwija mwoyi wànyì mupyamùpyà misangu yònsò yìndyadyà, bwà cinyi bìdi nàнку díbà adi?

⁴⁶⁵ Mèmè mpòngolwela màyi a mu mulòndò mu cìlàwudi, ne àfika pankaci, ne pashìishe àbanga kupweka díbà dyònsò pamutù pàà kubàndawù; ne pàndi ntàmba kuàpòngolwelamù, mpàdiwu àtàmba kupweka lubilu. Ki bwalu mbwòbù abu's. Ne kwènàku mwà kucijaadikila ku maalu a mamanya bu byòbi

bikukèngela to. Mukàndà ewu ki cintu cimwèpelè bwà kujaadika ne Nzambi ngudi mukòse nànkù; ndiyi dipunga, Nzambi ùvwa mutùmòne tulwa.

⁴⁶⁶ Nwènú balùme banunu, ne nwènú bakàji banunu, pàmwápa bàmwè bàà—bàà kunùdi baabàyeenù ne bakàji bèènú bàkaadi bafwè. Aci kacyèna—aci kacyèna ciitacisha to nànsha kakesè. Àlèluuyàh! Bàdi ànu dyàmwàmwa dyà ridò dyàdya, bindile; kakuyi mpatà to. Ne bôbò bàdi bàjinga kwikala cyàkàbìdì neenù. Mmwômò, ncyà bushùwà, ki cìdìbo bàjinga. Bàdi bàjinga kwikala cyàkàbìdì pàmwè. Bible mmwambè nànkù, misùukà yìdì mwinshì mwà cyoshelu yìdì yèla lubilà ne: “Mukalenge, too ne dìbà kaayi?” Nwamònu anyi? Kabèèna mu ngiikàdìlù wabò mukùmòbàne to.

⁴⁶⁷ Nzambi kaakatwènzakù Banjèlo to, wàkatwènza bantu balùme ne bakàji. Netwikalè misangu yònsò ànu bantu balùme ne bakàji, bwalu tudi ci—cintu cyangata ku meeji a Nzambi yéyè mwinè. Tudi mwà kwikala misangu yònsò ànu bantu balùme ne bakàji.

⁴⁶⁸ Kàdi cìdì cyènza cinyi? Nwamònu’s, pàmwápa wèwè udi wela meeji ne pawàkayà ku cyoshelu apu, wèwè ne bàyeebè wa baaKapinga awu, nwènú kwamba ne tudi twangatangana muntu ne mukwèndè bwà kwikala bu mukàji musèla mwanýishìibwe ne kusòmba pàmwè mu ngiikàdìlù wa cijila wa dibàkà edì, ne ngàsà yà Nzambi ne bikwàbò, ne bujaadiki bwènú bwònsò bunùdi nufila abu, ne mucìpù wènú wunùdi benzè awu. Katancì aka, nubanga kumòna, nwènú bònsò bàbìdì. Mulùme ùvwa mululàme, ne nsukì yibàlakana; ne maman ne twìsù twèndè tulenga, tufìkùlùke atu, anyi mèsù a bleu, anyi cyònsò cìvwàku aci. Kaa, mùshindù mwinè wúvwà umutàngila’s. Wèwè uvwa upàtuka, utàngila papa ne: “Mpindyewu, olòlàku makaaya awu ùlùjè paanyimà’s”; kàdi paanyimà pàà cikondo àbanga kukòbama. Maman neàtolokè mvyà, binyòkà bìbanga ne bikwàbò. Ne paanyimà pàà cikondo, ki mukàji uyààya wàwa, anyi mulùme uyààya wàwa.

⁴⁶⁹ Cìvwa ncinyi? Paakanùmòna Nzambi biimàne mwaba awu, Yèyè ne: “Ki cyòci aci, mùshindù awu ki wùndì Mèmè muswè bwà nwènú kwikala. Èyo. Wèwè lufù, lwàku, kàdi kwèna mwà kubàngata Mèmè ncìyi mukupèeshe dyanyisha to.”

⁴⁷⁰ Kaa, kaa, ndi ngeela meeji kùdì Yobò. Èyowà, Nzambi ùvwa mutàngìle panshì, Yobò ùvwa mumanyè ne Nzambi ùvwa mumunangè. (Kàdi mòna ne yéyè awu kèna mwà kukwangata to.) Kwamba Yè ne: “Umupyè mu byanza, kàdi kwàngaci mwoyi wèndè to.”

⁴⁷¹ Ki pashìishe katancì aka, makaaya àdi àbanga kukòbama, ne paanyimà pàà cikondo wèwè muyè. Ncinyi cìdì cyènzèke aci?

⁴⁷² Mpindyewu, mu dibìikà dyà ku lufù kamwàkwikala kantu nànsha kàmwè kàà kàleeja lufù mu cimfwànyì to. Kamwènakù

mwà kwikala kantu nànsha kàmwè kàà kàleeja buloba ebu mu cimfwànyì to, kàà cyà. . . Nwamònu's, wèwè uvwa wenda ukola ku diswa dyà Nzambì, uvwa ne mwoyi. Pashiishe lufù lùbwela, lùkutònkola. Mwikàle udyà cyàkudyà cimwècimwè aci ne bikwàbò byònsò, unwà màyi a mùshindù wùm wèwùm wè awu, byònsò abi; kàdi lufù ndubwelè. Kàdi fòtò mmumana kukwàta's. Àlèluuyàh! Mu dibìikà dyà ku lufù's newikalè cyàkàbìdì ne mwoyi. Nènku kakwàkwikalakù lufù to, anyi cintu cifwànàngàne ne lufù, anyi bukùlakàjì, anyi balèrà anyi cinyi. Katùyi tufwà to, netwimanè mu difwànangana Nendè, bapwàngaja bwà kashidi. Àlèluuyàh. Kaa, ndi. . . Aci's ncifwànyine kwelesha muntu kanà yònsò ewu mbilà, nangàngangà paùkaadi bukòlè bwànyì ebu.

⁴⁷³ Bukòlè bwànyì ebu, ngeela meeji, wèwè, mpaùdì welakù meeji, kutàmba byà kacya kwònsò eku. Wèwè udi ànu pa cikondo cyà nshintùlùkìlù aci, nudi numòna's. Kùdì. . . Udi ubanga kudìkonka ne: "Byònsò ebi bìdì cinyi? Cìndì mwenzè ncinyi?" Ntàngila paanyimà apa, ngeela meeji ne: "Kaa, Nzambì wanyì! Èè, dîbà dyàyi penyì's, Mukalenge? S'ki mèmè ewu, ne bidimu makùmi ànaayi ne mwandamukùlù, mu bidimu bìbìdì, nènku mbajè cyàbìbìdì cimwè cyà lukàmà. Yoyòyò! Ndi ànu. . . Tàngilààyi ànu nùmonè ndambù wa misùukà yìndì mupetè eyi; ndi muswè mpetèku mikwàbò mìliyò ne mìliyò." Nzambì, nkwaçishèku.

⁴⁷⁴ Ndi ndyùm vwa mene ne bundù bwà kwalukila kumbèlu bwà diikisha. Ndyàm bídìdila ne: "Kaa, dinowa dyàbobù, kàdi beena mudimu mbakesè. Mìliyò mu mpèkaatù ne bundù ki kufwàyi ditùkù dyònsò eku, tèèlejà dibìikila dyàbò." Ndi nya kalààla bufùkù kuntwaku ngumvwa bampàngaanù bânà bakwàte ne byà luse abu bèèla mbilà mikòlè mu ditùnga dyà kuntu kwàka adi. Mùshindù mwìnè wùdìbo bàlwa binunu ne binunu, bàpulumunangana naanyì, ne—ne biimàne ku cipalu cyà ndèkè aku kùvwà kùkèngediibwa bwà kwikalakù bampùlushì kuntwaku bwà kubàlamina pa bule, ànu bwà kuumvwa cyaanàanà bwalu-bulonda bwà Yesù Kilistò.

⁴⁷⁵ Kàdi mùneemu tudi mwà kusèngeleelangana, ne kufila mamanyisha mu bibèjibeji ne bikwàbò byònsò, ne kupeta myaba yà mitàmbe bwìmpè yà kusòmbabò, dicyònkomojangana dyà ditàmbe bulenga ne misambu milenga, bàdi balwè kàdi bàmba ne: "Aaaaa! Èè, ndi ngeela meeji ne bivwa ànu bilenga's, kadi kí mbyà mu dyànyì diitabuuja to."

⁴⁷⁶ Kaa, ekèlekèlè, ntoo—ntoo—ntoo ne ku dîbà kaayi kùdìbì mwà kushààla's? Kabyèna. . . kí mbìmpè to. Mùneemu ki twètù kwimanshangana ne mìntùta ne mìntùta yà binunu byà kilò yà byàkudyà ku diyaala eku, pààbì bantu abu's mbafwànyine kubyàkidila ne disànka dyònsò. Bòbò's mbifukùibwà byà pa buloba ebu byà mwòmùm wè ànu ne twètù aba. Ekèlekèlè,

twètù. . . Èè, awu ngenzèlù wa maalu kêna mwà kunènga ntàntà mupitèpìte bule nànsha.

⁴⁷⁷ Èyo, mpindyewu, Taatù Nganyi? Taatù ne Mwànà bàdi Umwe. Tàngilàayi, mu Yone wa Kumpàla 5.7, nCyambè ne: “Kùdi bàsàtù bàdi bàfila bujaadiki mu Dyulu, Taatù, Dìyì (didi Mwànà adi) . . . Taatù, Mwànà, ne Nyumà Mwímpè: bàsàtù aba bàdi Umwe.”

⁴⁷⁸ “Kùdi bisàtù bìdi bìfila bujaadiki pa buloba, bìdi mmâyi, mashi, ne Nyumà.” Byôbì abi ki bintu bisàtù byàkapàtukà mu mubidi wà Kilistò. Bààkatùbula lubadi Lwèndè: màyi kupàtuka, Mashi kupàtuka: “Mu byanza Byèbè Ndi ndàmbula Nyumà Wanyi.” Ki bwalu mbwabù’s, ki bintu bisàtù mbyôbì abi. Bisàtù ebi kabyèna umwe to, kàdi bìdi *byùmvwangana* mu umwe.

⁴⁷⁹ Taatù, Mwànà, ne Nyumà Mwímpè; Yone wa Kumpàla 5.7, ùdi wàmba ne: “Bàsàtù aba bàdi Umwe.”

⁴⁸⁰ “Mâyi, mashi, ne Nyumà bìdi *byùmvwangana* mu umwe.” Kabyèna Umwe to, kàdi bìdi *byùmvwangana* mu umwe. Pa nànkù Taatù. . . Ne cintu cìmwèpelè cìdiku mubidi mwà kwenza, pàdi Nzambì mwà kuDìmòna Yèyè mwinè, ne ku dinyooka dyàkàpìcìlà mubidi ewu, kùdi dicyàmakana. . . diimanyika mwaba awu mene, nudi numòna’s. Ki pàdiYe ùmòna Mashi miimàne pankàci Pèndè ne cilumbulwidi. S’ki Dìyì Dyèndè edi, dyambè ne: “Ditùkù diwàdyàku, ki ditùkù dyùdi ufwà.” Ne apa Yesù mmwambè ne: “Ndi . . . Kàdi Mémè ndi mwangàte kaaba kààbò. Wamònu’s, Mémè ndi mwangàte kaaba kààbò.”

⁴⁸¹ Nudi bavùlùke kaabwalu kàànyi kalonda dilòlò adi mùmvwà mumòne cikèenà-kumòna cyà mukàji awu mubi menemene uvwa mu cibambalu amu awu anyi? Ne mémè mvwa mmupìisha, ngamba ne: “Nzambì, bwà cinyì kùyìkù utayisha mwaba wònsò ewu?” Dìbà adi kùndeejaYe *mémè*, nwamònu’s. Ki mémè kuya kudiye e kumwambila cìvwà cyenzèke aci.

Mpindyewu, lukonko lwànyi lwà ndekeelu ndwòlò elu.

64. Udikù wèwè wela meeji ne, bilondèshile Mifùndu, beena Yuda nebiikalè. . . nebiitabè Kilistò pabwìpì menemene ne Dyambwibwa dyà Èkèleeziyà anyi?

⁴⁸² Mémè ndi—ndi—ndi bulelèlà ngiitabuuja ne Dyambwibwa dyà Èkèleeziyà. . . Ewu ngwanyi mmwèneni sungasunga, nwamònu’s. Nènku bu ne tuvwa ne dìbà, tuvwa mwà kucyàngata too ne ku ndekeelu, kàdi nyewu tukàadi—tukàadi bapite dìbà citèemà mpindyewu. Tàngilàayi, mémè ndi bulelèlà ngiitabuuja ne beena Yuda nebaàkidilè Kilistò ku Dilwa Dyèndè diibìdi. Mpindyewu vùlukàayi, bwà muntu ewu wàmònakù mwà kumanya nùnkù ne, mèsù ètu àkafofomijiibwa, anyi, mèsù àbò bòbò àkafofomijiibwa bwà twètù twamòna mwà kupeta lwètù lumònu. Muntu kanà yònsò ewu mmumanyè ne, Mifùndu nyidi yàmba cyòci aci. Mmwòmò anyi? Pòlò ùdi ùtwàmbila ne ètù. . . ne

twètù twâkafofomijiiibwa . . . ne beena Yudà bààkafofomijiiibwa bwà twètù twamòna mwà kwakidila Kilistò. Nwamònu anyi? Ne twètù tudi mucì wà cisuku wà olèvè wàkasomekiibwà mu mucì ku ditèèkiibwa.

⁴⁸³ Mpindyewu wanyì mmwènenu nyèyè ewu, nêngiikalè mwà kunùpèèsha ànu . . . Mbangeelè lukonko ne: “Udikù wèwè wela meeji . . .?” Mpindyewu mùshindù ngwòwù ewu wùndi mèmè ngeela meeji ne ngwènzekàbi. Ncyèna mumanyè to. Cyònsò cidiku aci, mèmè ndi mutwishùibwe ne ku ngàsà wa Nzambi ne ku luse Lwèndè, netwikalèku; nwamònu’s, ku ngàsà Wèndè, cyònsò cidiku aci. Bìdi mwà kwenzeka ne mpangè kucisùùlakaja, kàdi cìndi mèmè ngeela meeji ncyòci eci. Ndi ngiitabuuja ne tudi ku cikondo cyà nshùikidilu. Ndi mwitàbùùje ne cikondo cyà bàà Bisàmbà byà bende cìkaadi cyènda cìjika mpindyewu mene. Ndi ngiitabuuja ne tukàadi ku ndekeelu.

⁴⁸⁴ Nènku mpindyewu beena Yudà; bintu bibìdì bitù misangu yònsò ànu bishiye beena Yudà mu ntùpàkànyì mbyòbì ebi: Bòbò mbampofo, kabàvwa mwà kucimòna to; ne bwalu bàà Bisàmbà byà bendè, bwà cintu cimwèpelè, misangu yàbùngì . . .

⁴⁸⁵ Mwua nyiikilangana ne mwena Yudà kampànda ku Benton Harbor, Mwanèètù wa bakàji Smith, kàdi nudi bamanyè cyàkangambilàye anyi? Kuntwaku ku wùmwè wa ku beena Izàlèlèlè abu . . . wà ku myaba yà Izàlèlèlè aku. Lukonko elu pa dyondopiibwa dya muntu mulùme mpofo awu. Ki yèyè ne: “Kanwèna mwà kukòsolola beena Yudà mu . . . Kanwèna mwà kukòsolola Nzambi mu bitùpà bisàtù kàdi kuMupèèsha mwena Yudà, nuMwenzà Taatù, Mwànà, ne Nyumà Mwímpè to.” Yèyè ne: “Kanwèna mwà kwenzela mwena Yudà aci to, twètù katwèna bakuukwidi bàà mpìngù nànsha.” Yèyè ne: “Twètù tudi twitabuuja Nzambi *umwèpelè*.” Nwamònu anyi?

⁴⁸⁶ Kàdi nwènù nujuuka nuvwija Nzambi yisàtù: Nzambi Taatù, Nzambi Mwànà, ne Nzambi Nyumà Mwímpè; s’ncyà bushùwà ne nudi nufofomija mwena Yudà mwaba awu mene, bwalu yèyè mmumanyè cìdi cìmpè. Yèyè’s mmumanyè bìmpè kutàmba aci. S’ncyà bushùwà ne aci cìdi mwà kunùvwija nwènù bakuukwidi bàà mpìngù abu ànu mùdì dikuukwila dya mpìngù amu, nudi ne nzambi yisàtù. S’bikèngela nùyìvwijè Nzambi umwèumwè awu, kì nnzambi yisàtù to, mmidimu yisàtù yà Nzambi umwèumwè awu. Nwamònu’s, Nzambi wàkàkwàta mudimu mu buuTaàtù, Wàkàkwàta mudimu mu buuMwànà, ne Ùdi ùkwàta mudimu mpindyewu mu cipungu cyà Nyumà Mwímpè. Ùdi n’Nzambi umwèumwè awu.

⁴⁸⁷ Ki bwà cinyì tudi batùmìibwe ne mudimu bwà kubàtiiza mu Dìna dyà Taatù, Mwànà, Nyumà Mwímpè; bwalu, kaciyi mu dìnà dyà . . . Mu *Dìna*, kì mmènà to; kì mmu mènà to, anyì mu dìnà dyà Taatù, mu dìnà dyà Mwànà, mu dìnà dyà Nyumà Mwímpè to; kàdi “mu Dìna dyà Taatù, Mwànà, ne Nyumà

Mwîmpè.” Nwamònu’s, kujingulula ne Nzambi umwèumwè awu ùdi n’Kilistò. Nwamònu’s, aci ki cidìYe, kacỳèna mwà kwikala mûngà mùshindù to. Nwamònu anyi? Nènku Mifùndu. . .

⁴⁸⁸ Nènku—nènku dibuulula dyètù dyòdi dyà mashimi, nànkù Peetèlò ne bakwàbò bàpostòlò abu bààkalongesha cintu cyà mashimi; bwalu muntu ne muntu mu Bible wàkabàtìijibwa mu Dîna dyà Mukalenge Yesù Kilistò. Kacya muntu nànsha umwe kàakabàtìijibwakù mu dîna dyà “Taatu, Mwàna, Nyumà Mwîmpè” to, aci ndilongesha dyà Kàtòlikè. Mèmè ndi mwà kunùjaadikilaci ku mèyi àbò sungasunga, ne nkòngamyakù yàbò sungasunga ne bikwàbò byònsò. Ntwitabàayi wa Kàtòlikè ne—ne kí ndilongesha dyà Bible to. Ne muntu nànsha umwe. . .

⁴⁸⁹ Nànsha mene Mfùmù wa Angleterre wàkabàtìijibwa mu Dîna dyà Yesù Kilistò. Bidimu bitwè ku nkàmà yisambòmbò paanyimà pàà lufù lwà mùpostòlò wa ndekeelu, pàvwà ditùngà adi kadiyi dyanjì nànsha kubìikidiibwa ne ng’Angleterre musangu awu to, divwà dibìikidiibwa ne “Ditùngà dyà Banjèlo.” Ki kùdidi difùmine, dîna adi. Yèyè kubàtìijibwa mu Dîna dyà Yesù Kilistò.

⁴⁹⁰ Cyàkamukùdimwishà mucìma, nkanyuunyi kakesè kàà mushààmushà. Pàvwà. . . Bu mèmè mwà kuvùluka, kí n’Saint Angelo to. Mpindyewu, dîna dyèndè ùvwa nganyi apa’s? Agabus, Saint Agabus, ngeela meeji ne mmùvwàdi. Mpindyewu, ncyàkutwishibwa bwà dîna adi to. Kadi, nànsha nànkù, yèyè wàkaya kuntwaku, ne bààkafikisha bàmwè bàà ku bòbò aba. . .

⁴⁹¹ Bàvwa bàbàbìikila ne mbanjèlo, bwalu bantu abu ne beena Assyrie ne bakwàbò bàvwa ne mubidi mufiike, kadi ba-Anglais aba bàvwa bòbò ne nsukì mileepa, mitòòke, ne nsukì yà mvwàngalà, nsukì mitòòkòlòke, ba-Anglo-Saxons abu, nudi bamanyè’s, ne mèsù a bleu. Ne bààkamba ne: “Bàvwa ne mmwènekèlu wa Banjèlo,” ki pa nànkù kwinyikabò ditùngà adi ne “Ditùngà dyà Banjèlo.”

⁴⁹² Ki musadidi wa—wa Mukalenge awu kuyayè kuntwaku ne ùvwa munkaci mwà kuyiisha mfùmù wabò awu, ne bòbò bàvwa basòmbe mu mwaba munènè wà dyotela mudilu, wà pambèlu. Mwva mbala bulonda abu ànu àbidi àdi panshi aa. Ki kanyuunyi kakesè kubùuka e kubwelakù mu bukènkè amu ne kwalukilakù pambèlu, ki mfùmù awu kwelayè lukonko ne: “Kanyuunyi aku kàvwa kafùme penyì ne kàayi penyì?” Nwamònu anyi? “Kààbwedi mu bukènkè, ne twètù twakàmònu, ne kàpàtuku kàayi cyàkàbidi kabwela mu mîdimà. Mùshindù awu kí ngùdi muntu ùya anyi?” mwàkambàye.

⁴⁹³ “Kadi kàvwa cinyì kumpàlà kwà kubwelakù mwab’ewu?” mwàkambà muyiishi awu, nwamònu’s. Aci kulengaci mfùmù awu; nènku pàakacỳabu mu dîndà, yèyè ne bàà mu nzùbù mwèndè bàakabàtìijibwa mu Dîna dyà Yesù Kilistò. Ncyà bushùwà.

494 Kàdi pashìishe? Muntu wa kumpàla wákamyaminyiibwakù màyi anyì wákabàtiijiiibwakù mu mùshindù mukwàbò mu dìnà dyà “Taatù, Mwànà, Nyumà Mwîmpè,” ùvwa mmu èkèleeziyà wa Kàtòlikè. Dimyaminangana dyà màyi dyà kumpàla dikaadiku dyenzèke, divwa mmu èkèleeziyà wa Kàtòlikè. Dipòngolwelangana dyà màyi dyà kumpàla dikaadiku dyenzèke, divwa mmu èkèleeziyà wa Kàtòlikè. Èkèleeziyà wa Mishòònyì ùvwa misangu yònsò ànu ùbàtiiza. . .mu Bible, bàpostòlò, mu diinyijangana dyà mu màyi mu Dìnà dyà Yesù Kilistò. Myaba yònsò. Anji petàayiibi ànu mwaba wùmwe cyanààna wùkaavwàbòkù babàtùjiiibwe mûngà mùshindù, nwamònu’s.

495 Mpindyewu, mu cyòci eci, cikondo cyà butùmbi eci, beena Yudà kabèèna mwà. . .Ngákakonka laabì awu, kwamba ne: “Laabì, mbifwànyinekù kukukolela bwà kwitabuuja bapròfetà anyì?”

496 Yèyè ne: “Mémè ndi ngiitabuuja bapròfetà.”

497 Mémè ne: “Mu Yeshàayi 9.6, cìvwàye muswè kwamba ncinyì ne: ‘Bátùlelèdì Mwànà wa balùme’? Ùvwa wàmba bwà nganyì?”

498 Yèyè ne: “Ùvwa wàmba bwà Maasiyà.”

499 Mémè ne: “Nàнку Maasiyà neàlediibwè anyì?”

500 Yèyè ne: “Ùvwa ne cyà kulediibwa.”

501 Mémè ne: “Dìbà adi pìikalàbi ne Yèyè ùdi ne cyà kulediibwa, Yèyè’s ùdi ne. . . Yèyè’s neikalè ne maamù.”

502 “Èyowà, Yèyè ùdi ne cyà kwikala ne maamù. Ne kàbidì, Ùdi ne cyà kwikala ne taatù,” mwàkambàye.

503 Mémè ne: “Kakùyi mpatà to. Nènku mbifwànyine kukukolela bwà kwitabuuja ne mbifwànyine kwikala. . . ne Nzambì Yèhowàh Munène Wákakàngula Mbù Mukùnze awu, kàvwakù mufwànyine kulela Mwànà ewu ku dilediibwa dyà kadiyi katobà anyì?” Nwamònu anyì? Bwalu kàdi kumwimanyina’s.

504 Yèyè ne: “Kàdi kanwèna mwà kuMuvwija nzambì yisàtù to.”

505 Mémè ne: “Yèyè kèna nzambì yisàtù to.” Mémè ne: “Ndipetangana kaayi diikalàku pankaci pàà Maasiyà ne Nzambì?”

506 Yèyè ne: “Neikalè Nzambì.”

507 Mémè ne: “Bwà mpindyewu kaayi wáfikì. Bwà mpindyewu wáfikì, Yèyè ùdi Nzambì.” Aci mmùdici menemene.

508 Dìbà adi kuteetayè bwà kungambila, yèyè ne: “Èè, muntu awu ùvwa mwívi, Yesù wa mu Nazàlèètà awu. Ùvwa mwívi.”

509 Mémè ne: “Laabì, Yèyè ùvwa mwívi bishi?”

510 “Èè,” mwàkambàye, “mifùndù yènù nwènù biinè ayi’s mmyambè ne ‘Yèyè wàkabwele mu budimi bwà blé mu ditùkù dyà Nsabatù, ne wàkàngata blé.”

511 Mémè ne: “Mpindyewu, laabì, wèwè’s udi mumanyè cidi citámbe bwímpè. . .mumanyè Mifùndu kutámbe apu. Mifùndù yènù nwènù biinè’s yìdi yámbe ne aci ncikùmbànàngàne ne mikenji: ‘Mbyanyishìibwe bilondèshìle mikenji bwà muntu kuyayè kadyà blé búngì bwónsò bùdìye muswè abu, kàdi kèèdi mu mufuku bwà kuyayè nendè to.’ Mukenji wènù nwènù biinè’s, laabì.”

512 Ki kwimanayè mwab’awu ndambù, yèyè—yèyè—yèyè kuciitabuuja, bwalu wàkacijaadika. Kwambayè, paanyimà pàà katanci, yèyè ne: “Èè, ncinyì—ncinyì cyakenzà ne mèsù a John. . .” Yèyè ne: “Wèwè wacyènji munyi?”

513 Mémè ne: “Mu Dìná dyà Yesù Kilistò.”

514 “Uh.” Yèyè—yèyè kàvwa mumanyè to; yèyè ne: “Èè, kwèna mwà kukòsolola Nzambì mu bitùpà bisàtù to.”

515 Mémè ne: “Yèyè ùvwa Yèhowàh mumwènèshìibwe mu mubidi, Laabì. Yèyè. . .Ki civwàYe ncyòci aci, Ùvwa Yèhowàh mu mubidi. Dìná Dyèndè Sungasunga dyà buntu, divwà Dìná dyà bupikudi, bwalu díngà díná kaditukù difidìibwe mwinshì mwà Dyulu didi muntu mwà kusùngidìibwa ku dyòdi to, ànu ku Dìná dyà buntu dyà bupikudi adi: Mukalenge Yesù Kilistò. Ncyà bushùwà. Yèyè ùvwa Nzambì, Yèyè ùdi Nzambì, Yèyè neikalè Nzambì kashidi, ncyà bushùwà menemene, Mukalenge Yesù Kilistò.”

516 Mpindyewu, ndi ngiitabuuja ne èkèleeziyà wa bàà Bisàmbà byà bendè àbidi àdi panshi aa neikalè. . .dikùmbaja dyà mubidi wa èkèleeziyà wa bàà Bisàmbà byà bendè. Biibi bìdi pankaci pàà. . .Yesù wàkamba, mu Maatàayi 24, (nèngàngatè Mufùndù wùmwèpelè awu bwà katanci kakesè), Yèyè ne: “Nebàdyatakajè ku makàsà bimanu byà Yelusàlèmà too ne pààjikà cipungu cyà bàà Bisàmbà byà bendè.”

517 Mpindyewu tàngilàayi. Cyàkafidìibwa kùdi Mukalenge wetù Yesù, mu Maatàayi 24 ne, beena Yudà nebùùmushiibwè mu cimfwànyì aci. Danyèlè wàkamba, mu bapròfetà bàà kale mwàmwa, mwambè ne nekwikalè mbingu makùmi mwandamutekète yicivwà mikòsa, bwà beena Yudà. Ne Maasiyà ùvwa mwà kulwa (Mfùmù awu) ne ùvwa mwà kwamba cipròfetà munkaci mwà lumingu lwà makùmi mwandamutekète, yìvwà miikàlè bidimu mwandamutekète, Yèyè ùvwa mwà kuumushiibwa munkaci amu. Tàngilàayi mùvwàbi bipwàngàne, Yesù wàkayiisha ànu menemene bidimu bisàtù ne citùpà ne wàkapoopediibwa pa nkùrusè. Kàdi kùdi bisàtù. . .Aci ncilwè buludì ku lukonko lukwàbò elu kaaba aka. Kùcidi bidimu bisàtù ne citùpà bibàkòsela, beena Yudà abu. Bidi ne cyà kwenzeka.

518 Mpindyewu bu nwènù mwà kwangata Bwàkabuulwibwà, nshapità wa 7, Yone wàkamòna binunu lukàmà ne makùmi ànaayi ne binaayi byà beena Yudà bònsò batwibwe citampì, bàà bisàmbà dikùmi ne bìbìdì byà Izalèèlà. Nudi bamòne cìndì njinga kwamba aci anyi? Kàdi mbidyànjlila kumòna ne nebyènzekè, bwà dilwa dyàbì.

519 Mpindyewu tàngilààyi mùdìbì bilenga, kumpàlà kwà twètù kujikija mpindyewu. Tàngilààyi mùdì—mùdìbì biya. Mpindyewu, beena Yudà abu mbabwejìbwe mu mîdimà.

520 Mpindyewu, beena Yudà bàdì muneemu aba, bààbùngì bàà kùdìbo muneemu emu, bàdì ànu...s'nudi bamanyè mùdìbo, bôbò mbàdì balamè bubanji bwà pa buloba bujimà. Ne bôbò bàdì ànu—ànu bantu banangi bàà mfrangà, ne ki cyònsò cinùdiku mwà kupeta kwòkù aku, nwamònu's; ne mbadyàmbi bàà èyo, ne kabàyi bàcyùka maalu, ne kabàyi bàtèèlejakù to. Kàdi, kí ng'abu bàvwàYe wàmba to, bu nwènù mwà kumòna.

521 Mpindyewu, bàà Bisàmbà byà bendè...Mpindyewu tàngilààyi, kùcidi kushàale bidimu bisàtù ne citùpà bwà beena Yudà aba. Mpindyewu, Yesù mmwambè ne cimenga cyà Yelusàlèrà ne bəcìdyatàkàjè ku makàsà kùdì bàà Bisàmbà byà bendè too ne pìikalà cipungu cyà bàà Bisàmbà byà bendè... (Mpindyewu, nwènù bàdì kanùyì nwitabuuja bipungu abu, nudi nwamba bìshi bwà aci?)...Too ne pààjikà cipungu cyà bàà Bisàmbà byà bendè. Nènku pààjikà cipungu cyà bàà Bisàmbà byà bendè (cikondo cyà bàà Bisàmbà byà bendè cyàjiki), pashiishe cimenga aci ne bəcýàlùjilè beena Yudà. Kì Yesù kutungunuka ne kwamba ne lukòngò... Yèyè ne: “Panùdì nupàtuka numòna mucì wà mfigi wèla ntòngà, ne micì mikwàbò yònsò yèla ntòngà,” ne, “nudi numanya ne muvù wà luuyà wùkaadi pabwìpì.” Yèyè ne: “Byà mwomùmwe kàbìdì panùdì numòna maalu aa ènzeka, nùmanyààyi ne cikondo cìkaadi pabwìpì, ku ciibi; ne bulelèlà Ndi nnwàmbila ne lukòngò elu kalwàkupità to maalu aa kaàyi mùle.”

522 Mpindyewu, bôbò bàvwà bacìndìle mu lukòngò alu ne: “Ncyòcì aci cìvwàYe wàmba.” Nànsha kakesè!

523 Tèèlejààyi! Yèyè wàkamba ne: “Lukòngò lùvwà lumòne mucì wà mfigi wèla ntòngà alu.” Mpindyewu tàngilààyi, Yèyè ne: “Mucì wà mfigi, ne micì mikwàbò yònsò.” Mpindyewu, mu ngaakwilù mukwàbò ne: “Nekwikalè ditàbuluja dyà buloba bujimà pa dìbà adi.” Mpindyewu tàngilààyi cipròfeta eci, mùdici cìkwàta mudimu ne cìnwàngana ànu bipwàngane. Mpindyewu tàngilààyi. “Micì mikwàbò yònsò yèla ntòngà, yitàbuluka.” Mucì, pàdìwu wèla ntòngà, wùdì wùfùùluluka. Mmwòmò anyi? Mpindyewu, muntu kanà yònsò ewu, mulongeshi wa cipròfeta mmumanyè ne, mucì wà mfigi wùtu misangu yònsò ànu beena Yudà. Aci tudi bamanyè. Mbeena Yudà. Mpindyewu... .

524 Nènkù tàngilààyi Yowèlà, pàakacyàngatàye, wàkamba ne: “Cyàkashiyàbo kùdi mukùmbi wà ngazama, mukùmbi wà hazilà wàkacidyà; cyàkashiyàbo kùdi mukùmbi wà hazilà, mukùmbi wà lokùsètà wàkacidyà; ne cyàkadyàbo kùdi mukùmbi wà lokùsètà...” Bu nwènù mwà kumòna, ncìshì ànu cimwècimwè aci, mu bitùpà bishiiilàngàne: mukùmbi wà ngazama, mukùmbi wà hazilà, mukùmbi wà lokùsètà. Byònsò abi ncìshiishì cimwècimwè aci, cidi ànu mu bitùpà bishiiilàngàne byà mwoyi wàci. Mpindyewu tàngilààyi, cìshiishì cimwècimwè aci cyàkabanga kudyà mucì wà beena Yudà awu kale wàwa, kuwùpulaci, ne cyàkabanga kudyà ne kudyà ne kudyà ne kudyà too ne mwàkafikàci ku cikuuku; kàdi pashiishe kwambayè ne: “Mémè nèngàalujululè,’ mùdi Mukalenge wàmba, ‘bidimu byònsò byàkadyàbo kùdi mukùmbi wà hazilà abi. Ne Nèmvwijè cisàmbà Cyànyì cintu cyà disànka.’” Nwamònu anyi? Mpindyewu, mucì mmudyà too ne kwinshì. Bàà Bisàmbà byà bendè bàakasomekiibwamù, aci ncilelèlà. Èyo, bikèngela tükwamaàyi mamuma.

525 Mpindyewu pààlwà cikondo cyà nshiiکیدیلو, patwàpwekà too ne ku ndekeelu (piikalàbi ne ndi mucimòne mu cyòci), Èvànjeeliyò ùdi ne: kùdi ne cyà kwikala ditàbuluja dinène munkaci mwà kwenzeka.

526 Mpindyewu, nuvwakù bamanyè ne dibèndelà dyà beena Yudà ki dibèndelà dyà ditàmbe kwikala dyà kale pa buloba anyi? Ne ditu dishààle kadìyi dyènza cintu to munda mwà bidimu binunu bibidi, bipite ne piinè apu, bitwè ku bidimu binunu bibidi ne nkàmà yitaanu. Dibèndelà dyà beena Yudà adi, dyà mùtootò wà matumba àsambòmbò dyà Davidi adi, kaditu dipeepèku to munda mwà bidimu binunu bibidi ne nkàmà yitaanu; kacya ku dikwaciibwa dyà ku bupika dyà nu—mu Baabùlònà aku. Nènkù mpindyewu, bwalu Bukalenge bwalàbàlè bwà beena Loomò bwàkabàkwàta ku bukòokeshi bwàbù (ne Maasiyà kulwa ne kuCibèngabò), ne kutangalajiibwabò ku mpeepèlè yinaayi yà pa buloba. Kàdi nukààvwakù bamanyè ne, mu matùkù àsambòmbò a ngondo mwitànù, cidimu cyà 1946, dibèndelà adi dyàkaalukila cyàkàbidi pa Yelusàlèmà anyi? Nukààvwakù bamanyè ne, mu matùkù mwandamutekètè a ngondo mwitànù, cidimu cyà 1946, Mwanjèlò wa Mukalenge wàkammwènekela (ditùkù dyàkalondà) kuntweku, ne muntùme pa buloba bujimà bwà kwenza ditàbuluja anyi? Dìndà mene dyàkalondà adi’s! Pàakabàndà dibèndelà adi mu Yelusàlèmà, pàvwà dibwela dyà dibà dyènzeka mu mapingaja amu, Mwanjèlò wa Mukalenge wàkamwèneka mùneemu mu Ètats-Unis musangu wùm wèwùm wè awu. “Panwàmòna mucì wà mfigi ne micì mikwàbò yèla ntòngà!”

527 Mbanganyi bàdi bavùlùke Mùtootò wàkalembèlèlè ku Musùlù wà Ohio eku awu, kùkaadi bidimu byàbùngi, pàakambàYe...S’ki fòtò waWù nyéye ewu mucikàlepù,

pààkapwekàYe. Yéyè kwamba ne: “Mukenji wèbè newùpatukè bu mudyànjididi wa Dilwa dyà cyàkàbìdì, ànu mwàkapàtukà Yone bu mudyànjididi bwà Dilwa dyà kumpàla amu.” Ne, tàngilàayi, pa buloba bujimà mpatangàlake ditàbuluja’s. Misangu binunu makùmì kuvudija ku binunu ne binunu, ne ditàbuluja dinène.

528 Beena ne ànu mikenji bònsò, ne bashiilèshiiàngàne bònsò bàà mu nyùngulukilu wa ditùnga, ne èkèleeziyà minène kwambabò ne: “Matùkù a Billy Sunday àjiki.” Kàdi pààkamònàbo èkèleeziyà ùbanga kutàbuluka (bantu bèètù bàà pàtupù aba), bìvwa bikèngela bwà kusùngilabò mpàlà wabò. Charles Fuller nùnkù yéyè nguwwa mwà kwikala mwàngate kaaba aku, kàdi ùkaavwa mutàmbe kukùlakaja; pa nànkù kuyabò ne Billy Graham. Ki Nzambì kwàngata Billy Graham, anyi, èkèleeziyà wa ba-Baptistes ngwàkamwàngata, ki bòbò bònsò kumunyùngulukilabò. Kàdi Billy Graham kèna wa cyàbìbìdì cimwè cyà muyiishi mùdì Mwanèètù Neville to, bwà kwikala ànu muyiishi, kabiyi ku . . .to, nànsha kakesè. Kàdi ncinyi aci? Bìvwa bikèngela bwà kucyènzabò, cidi ndongolwelu, ne bantu bònsò bacinyùngùlùkile buludì, bacikùngwile. Billy’s ùdì wàmba cintu cimwècimwè aci. Nwamònu’s, bìvwa bikèngela bwà kucyènzabò. Ne bìvwa bikèngela bwà kwenjiibwaci bwà kuuja Dìyi dyà Nzambì. Kabàvwa ne Nyumà bwà kudikùngwijabò to, pa nànkù bìvwa bikèngela bwà kwàngatabò Dìyi bwà kudikùngwilabò; ki kwenzabò nànkù. Ne Billy yéyè mmuyiishi wa Dìyi, ne mwimpè be, ki kumukùngwilabò; ki aci kubwejaci byònsò byà mashikà byà kwìsùkwìsù mu didikùngwija dyàbò adi. Ne Kampànda mutàmbe mfùkulu, mwikàle ne dyondopa dyà kùdì Nzambì, ne makolè ne byenzi ne bikwàbò, ku bishimà byà Nzambì, kutèeka cyòci eci. . . Èkèleeziyà, Mukàjì-musèla mwambwibwe udi ne Maanyi mu mwèndù Wèndè awu, kuMubweja mu ditàbuluja. Nwamònu anyi? Ki èkèleeziyà wa mashikà wa bintu byà kwìsùkwìsù awu kupetayè dyèndè ditàbuluja. Kàdi’s ki Izalèlèlà ewu wàlukila mwikàle ne ditàbuluja.

529 Ndi ne mukàbà wà bindidimbì mu nzùbù mwànyi mwàmwa mpindyewu: *Tusunsa Tùsàtù Kumpàla kwà Mundankùlù*. Ne tudi ne mukàbà wà bindidimbì wà beena Yudà abu bàalukila. Bàalukila; nutu bacimòne mu cikàndàkàndà cyà *Look*. Ne màzuwà a màyi, mapàya muuja tètè, àfumina mu Iran mwàmwa ne kuntu kwònsò aku; kacya beena Yudà abu kabàvwakù bamanyè ne Yesù ùkaavwakù pa buloba to, bàakaya kuntwaku mu dikwàciibwa ku bupika kùdì Baabùlònà. Ki cyònsò civwàbo bamanyèku ncyòci aci. Bàvwa bàdima . . .nvwà bacimòne mu cikàndàkàndà cyà *Look* anyi cyà *Life* ne bikwàbò, myaba yìvwàbo bàdima ne milabì yà kale yà micì. Nènku pààkamònàbo ndèkè ayi yìbwela, bàakadyàmbidila ne: “Ki cyòci eci.” bwalu Nzambì ùvwa mubàmbile ne “bàvwa mwà kwikala kuntwaku,

ne bàvwa ne cyà kwalujiibwa ku Yelusàlèmà pa mapwápwà a mikanku.” Ncyà bushùwà. Ki bôbò abu’s. Ki beena Yudà abu kwambabò ne: “Ki cyôci eci.” Kubàndabò buludì mwômò amu, ne tudi ne maafôtô ne mēyì àbò sungasunga, ne bôbò kubèèla nkonko; bàfùmina pa buloba bujimà. Bàmwè bàà kùdìbo bambùle bakulàkàji bààbò paanyimà, ne bampofò ne bikalàbà. Nènku bàvwa bàtùuluka ku màzuwà a màyi aku bàfùmina ku bitùpà bishìilèshìilàngàne byà pa buloba, bààlukila.

⁵³⁰ Ki kubangabò kwangula mabwe panshi apu, bàèla mu mifuku; kàdi leelù ewu mbasangàne mishìmi yà màyi, mbashààle ditùngà ditàmbe, didì ditàmbe bunène pa buloba mu maalu a madimi. Mbù Mufwè ùdi ne mabanji kutàmba myaba mikwàbò yònsò yà pa buloba misanga ntete. Beena Yudà bàdi munkaci mwà kwalukila; ncisokoka bàà Bisàmba byà bendè, kàdi ki kusampilabò bu cilòngò cyà rose eku.

⁵³¹ Kubàmbilabò—beena Yudà abu, kubàmbilabò ne: “Nudi nwalukila bwà kufwila mu buloba bwènu.”

⁵³² Bôbò ne: “Tudi twalukila bwà kumòna Maasiyà. Yèyè mwinè ùdi penyì? S’Ùdi ne cyà kwikala muneemu.”

⁵³³ Mwanèètù, paùdi umòna mucì wà mfigi awu wèla ntòngà, Yèyè wàkamba ne: “Lukòngò elu kalwàkujikakù to byònsò kabiyi byùle.” Tàngilàayi ditàbuluja didì ne beena bintu byà kwìsùkwìsù aba adi. Tangilaayi ditàbuluja didì ne Èkèleeziyà adi. Tàngilàayi ditàbuluja didì dibwelà ne beena Yudà adi, mbindile dilwa dyà Maasiya. Èkèleeziyà, Èkèleeziyà udi mùle tètè ne Nyumà, Mukàji-musèla udi ne...baavirgò bàdi ne maanyi mu myèndù yàbò abu nebàbwelè mu Didya dyà Dibanji.

⁵³⁴ Beena Yudà nebàmbè ne: “Eci ki cyôci aci. Ki Nzambì wetù utùvwà bindile wàwa.” Ki mwaba wùdi binunu byènu lukàmà ne makùmi ànaayi ne binaayi. . .pàvwà ba-Russellistes bapetèle cibwejàkàji mpòpù apu. Ki beena Yudà abu mbôbò abu biimàne mwaba awu bìikalà mwà kuMwakidila. Bôbò ne: “Ki Nzambì wetù utùvwà bindile wàwa.” NebàMumònè, bàmbè ne: “Nkwèpi k’Ùdi mubipetèle? Nkwèpi k’Ùdi mupetèle bibangu bidì mu cyanza Cyèbè abi?”

⁵³⁵ Yèyè ne: “Ndi mubipetèle mu nzùbù wa balundà Bàànyi.” Ncyà bushùwà ne: “Nzùbù wa balundà Bàànyi.”

⁵³⁶ CyènzàYe ncinyì? Èkèleeziyà wa bàà Bisàmbà byà bendè nèikalè mwangàcìbwè mu Butùmbi ne Mukàji-musèla musèdìibwè kùdi Kilistò.

⁵³⁷ Mmunyì mwàkadìmanyishà Yòzefù kùdi bàà kwabò? Wàkuumusha muntu yònsò wa bàà Bisàmbà byà bendè mu bwikadi bwèndè. NcyàkenzàYe cyà bushùwà. Ncinyì cyènzekelà bàshàadilè bàà dimiinu dyà mukàji? Dragon wàkapwidijila màyi a mukana mwèndè bwà kwenzayè mvità; Yesù wàkamba ne, “nebèèdiibwè mu mîdimà yà pambèlu, ne nekwikalè myadi

ne ditwà dyà mikèmù ne disùmakaja dyà ménù,” mēbà manènè a dikèngeshangiibwa ne mateeta nebifikilè èkèleeziyà wa bàà Bisàmbà byà bendè.

538 Ncinyi cyènzekà dībà adi? Pààlwà dishebeyiibwa bwà diitabuuja, piikalà Nzambi mutàpùlùle bintu byònsò ne beena Yudà kuntu kwàka, Yesù neàlukilè mwàkaalukilà Yòzefù amu. Pààkumvwàbo Yòzefù, pààkumushàye balami bèndè bònsò ne bikwàbò byònsò, ne kumònayè Benyàminà mutekète awu ne bakwàbò abu biimàne mwaba awu, ne bóbò munkaci mwà kunyingalala bwà mùvwàbo bashebèye Yòzefù. Bàvwa bèèla meeji ne bàvwa bashebèye Yòzefù, kàdi's ki yèyè ewu mwimàne kumpàlà kwàbò. Kwambayè ne: “Mmémè Yòzefù. Mmémè mwanènù awu.”

539 Ki kuzakalabò ànu cyà bushùwà ne: “S'n'Yòzefù. Mpindyewu twàmumanyi.”

540 Pàm̀bàYe ne: “M'Mémè Yesù. M'Mémè Maasiyà awu.”

541 Nebàmbè ne: “Kaa, ekèlekèle, mpindyewu citwàpeta's!”

542 Byònsò abi byàkenjiibwa bwà butùmbi bwà Nzambi. Kabyàkwikala ne Yèyè ùdi. . . Èè, bàvwa mwà kumuumvwa ùdila too ne mu nzùbù wa bukalenge wa Pàlò, Yòzefù ùdila bwàbò bóbò.

543 Indilaayi too ne pààmònà Yesù beena Yudà bàvwàbi bikèngela bwà Yèyè kuvwija mpofo abu bwà kutùshiila twètù bàà Bisàmbà byà bendè aba mpùngà bwà kubwela, aci's neciikalè dībà, mündi nzwàmbila. Yèyè neàngatè beena Yudà abu, nwènu kanùpampakanyikù to, beena Yudà abu nebàsungidiibwè. Èyowà's, mukalenge, bikèngela diikalèku. Nènku ki wanyì mmwènenu wa cyòci aci, ncyèna mwà kucimònakù mwaba mukwàbò kampànda mu Mifundu to. Bikèngela ùlamè bàsàtù abu pàmwè, cyàkàbìdi.

544 Bikèngela nùlamàayi virgò mu—mukùtākàne, è—èkèleeziyà udi ànu wa ku dīnà, wa ku mishiku awu, nwamònu's. Bikèngela nwàngatè èkèleeziyà. . . Mbwenà kwamba ne, mwena Yudà dyàmbedi, mwena Yudà dyàmbedi, yèyè udi ànu muntu mufofomija udi mwindile ku luseke awu awu. Bikèngela nwàngatè citùpà cidi cìlondà, mbwenà kwamba ne virgò mukùtākàne, uvwa ne njàngàjìngà, ne ùpàtuka ànu cyanààna ùya mu èkèleeziyà, ne ùkashààla wa mu èkèleeziyà, ne mwikàle muntu mwìmpèku awu. Pashiishe bìdi bikèngela bwà nwènu kwangata Èkèleeziyà, wa nyumà, Dyambwibwa, Mukàjì-musèla, ki yèyè udi mwimàne wàwa. Bantu bàsàtù abu, kwèna mwà. . . kí mbasambàkàne to, nànsha kakesè. Kabèèna bònsò bàmwè to. Kí ncidi Bantèmù bàà Yèhowàh bàmba ne, “kùdi binunu lukàmà ne makùmi ànaayi ne binaayi bìdi Mukàjì-musèla” aci to; aci ncyà mafi. Abu mbeena Yudà, nwamònu's. Kùdi Mukàjì-musèla, beena Yudà, ne virgò mukùtākàne. Nènku nudi

nubàngata bônso, nwamba ne: “Èè, bàdi bônso bàsàtù mu myaba mishiiàngàne.” Bônso abu, bàdi mu bitùpà bisàtù bishiilàngàne byà bantu. Bushùwà, kabèèna mwà kucyenza to.

⁵⁴⁵ Dìbà adi pàalukilà Yesù pa buloba . . . Beena Yudà, bàdi cinyi? Batungula bàà ku ntempèlù. Nènku pàalukilà Yesù, Ùdi ùlwa *ne* Mukàji-musèla. Yesù ùdi ùlwa misangu yisàtù: Wàkalwa musangu wà kumpalà bwà *kupikula* Èkèleeziyà Wendè, Ùdi ùlwa musangu mwibìdi bwà *kwàngata* Èkèleeziyà Wendè, Ùdi ùlwa musangu mwisàtù *ne* Èkèleeziyà Wendè. Nwamònu anyi? Menemene. Pa nàнку cidi cyònsò dilwa dimwèpelè dinène dipwàngàne, cidi cyònsò Nzambi umwèpelè munènè mupwàngàne; cidi cyònsò Kilistò umwèpelè munènè mupwàngàne; Èkèleeziyà umwèpelè munènè mupwàngàne, bupikudi bùmwèpelè bunène bupwàngàne. . . byònsò; cidi cilwa bisàtù, kàdi byònsò bìdi mu Umwe. Nwamònu anyi? Kí mbantu bàsàtù, *bikampàndà* bisàtù to; cidi ànu Mupèsonà umwèpelè, Èkèleeziyà umwèpelè, Mubidi wùmwèpelè, Kilistò umwèpè;è, Mukalenge umwèpelè “munda mwènù bônso, ne ku nwènù bônso,” ne bikwàbò mùshindù awu. Byònsò umwèpelè!

⁵⁴⁶ Mukalenge ànùbènèshè. Ndi munùlamè ntàntà mule be.

⁵⁴⁷ Bu Mukalenge mwà kwanyisha, mpindyewu, bu mémè mwà kwalukila cyàkàbìdi mu ndambù wa malòòlò, anyi mu dilòòlò dyà dyàlumingu kampànda anyi cintu kampànda cyà mùshindù awu, mpaasàtà ewu yéyè kàyi ne cintu kampànda pa mwoyi wèndè to, nènteetè bwà kwandamuna ku nkonko eyi. Kaa, kùdi yà mimpè be kaaba aka. Mbanganyi bàdi baswè kuyitèleja? Kaa, mémè ndi ànu muyinangè's. Ngànji nyibalèku cyàkàbìdi, ànu lùkàsàlùkàsà, kumpalà kwà twètù kwalujila mpaasàtà bulombodi bwà disangisha.

⁵⁴⁸ Tèelejàayi ànu eci cyanààna:

Mpenyi pàdi mabwe àleej- . . . ? Mabwe awu àdi àleeja cinyi mu Bwàkabuulwibwà, 21? Alu's ndwà lwimpè.

Umwijàku nyama yinaayi yà mu Bwàkabuulwibwà 5 ayi. Lukwàbò lwà lwimpè ndwòlù alu.

Bakùlù makùmi àbìdi ne bànaayi abu mbanganyi? Ki lukwàbò lwà lwimpè ndwòlù alu, nwamònu's.

Mwonji mukùnzè wà mu Genèsè 38 awu wùvwa wùmvwija cinyi? Nudi bavùlùke's, yéyè wàkaya kangata mukàj'a mwanèndè sungasunga ne wàkalààla nendè cyenzè bu ne ùvwa nndumbà; ne wàkatwà mushinga ne wàkalwa; ne pashiiše pàakalwà mwànà, bàakamuswika mwonji mukùnze ku cyanza (wàkacisàka pambèlu kàdi pashiiše kwalukilayè cyàkàbìdi munda), uvwa—uvwa ulonda awu kumudyànjidilayè. Kaa, alu's ndwà lwimpè's; ndwimpè cyà bushùwà.

Mmapà kaayi àdì àkèngelà kutùma pa bìdì bitàngilà lufù lwà bantèmù bàbìdì bàà mu Bwàkabuulwibwà 11 abu? Apu mpààlukilà Mòsà ne Eliyà bwà ditàbuluja dyà binunu lukàmà ne makùmi ànaayi ne binaayi ebi. **Màpà awu ncinyi?** Tàngilàayi nùmonè cidìwu, alu's ndwìmpè be.

Bansantu nebiikalè penyì paanyimà pàà bidimu cinunu byà...(lwà lwìmpè's ndwòlù alu, balùmyànà. Nekwikalè...)**...bukòokeshi? Nebiikalè ne mubidi wà mùshindù kaayi?**

Mmunyi mutwàlumbulwishà banjèlo?

Bwà cinyi nsuki yidi yilwa yà banjèlò mu Kolintò wa Kumpàla? Mu Mukàndà wà Kolintò wa Kumpàla. Nkonko mîmpè, mîmpè menemene.

⁵⁴⁹ Mukalenge ànùbènèshè. Ndi ntèkemena ne Mukalenge neàtwányishile bwà kudisangisha ne kuyiikilangana pa bintu ebi, byònsò mbwà butùmbì Bwèndè. Tudi bafwányine kupangakana pa mmwènu pa byòbì abi; kàdì nèngàmbè cintu cimwè ne, bu nwènu bònsò mwà kupeta disànkà dyàbùngì mu dibitèeleja mûndì mêmè naadi mu dibyàmbe emu, tudi tupicila mu cikondo cyà dicyònkomoka. Amen. Amen.

⁵⁵⁰ Èyo, Mukalenge ìkalèku mwìmpè menemene kunùdì mpindyewu. Kanùpu masangisha awu mwoyi to. Diyiisha dyà ku tudyòmbà dyà Mwanèètù Neville, mpindyewu, nku WLRP, mu diisambòmbò mu dindà pa dîbà citèemà jaajaaja; ngimbilù wa tungimbà tûnaayi wa Neville awu, ne ndi mutwìshibwe ne nebànwènzèlè bìmpè, nùkangulàayi bisanji byènu nùbàteelejè. Ne mêmè ne mùshindù, mêmè mwalùkile pa dîbà, anyi mumòne ne nèngiikalè mwà kwalukila, nèmbiikilè mukàjàanyi ku tèlefonè; bu Mukalenge mwà kungaanyishilakù bwà kuya kamòna Mwanèètù munanga mukùlumpè Bosworth. Ndi... Nwènu bònsò... nènku nèngàalukilè mu dyàlumingu dilòlò.

⁵⁵¹ Mukalenge ìkalèku mwìmpè menemene kunùdì mpindyewu. Nènku mwanèètù, mpaasàtà, anjì vwilàku apa bwà katanci kakesè cyanààna; nènku yèyè àngatè bulombodi bwà disangisha. Nènku:

Kanùpu mwoyi disambila dyà mu dîkù to,
Yesù ùtu muswè kutwilanganamù neenù;
Yèyè neàngatè lutàtù ne lutàtù lwènu lwònsò,
Kaa, kanùpu mwoyi disambila dyà mu dîkù to,

⁵⁵² Nudi banangè aci anyi? Mbanganyi bàtù bàsambila mu nzùbù mwàbò sungasunga? Tùmonàâyibì, bònsò...bònsò... Abi mbìmpè, ikàlà nushàalaayi pabwìpi ne Nzambì. Ikalaayi bìmpè, nwènu bàna bakesè, Nzambì neànùbènèshè.

Èyo, Mwanèètù Neville.



NKONKO NÈ MANDAMUNA PA EBÈLU CITÙPÀ II LUA57-1002
(Questions and Answers on Hebrews Part II)

DILONDANGANA DYÀ BULOMBODI, BULONGÀME NÈ DILONGESHA BYÀ ÈKÈLEEZIYA

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù dilòlò, matùkù à2 a ngondo wa dikùmi, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org